


内閣文庫	
番號	漢 8853
冊數	20 (18)
函號	286 168




綴じ部(喉部分)の文字など開きが不鮮明な箇所あり

楚紀卷之五十三

皇朝賜進士經筵講官修國史奉直大夫翰林院侍講學士臣廖道南謹撰

穆風內紀前篇

古者史氏采風陳詩輶軒命使彤管摛辭以宣
君德人文用徽以敷世教物采攸宜風變而雅
朝廷化熙雅變而頌郊廟典彝姬轍既東炎軌
自西賈騷悲汨禰賦臨漪兩晉以降六朝同趨
麗藻連翩玄思希夷茂開唐室闕演瀛輝燕許
詞宗李杜詩魁昌黎登徽宗元銘溪諸子升壇
彙測管窺肆若有宋升降隨時綺靡罔事易簡



日持我

明天啓寶典鴻規金匱秘藏玉署豐腴大雅久闕吾
誰與歸爰蒐往牒庸庸來儀撰穆風內紀前篇

賈誼

賈誼雒陽人年十八以能誦詩屬書聞於郡中吳廷
尉為河南守召置門下甚幸愛文帝初立聞守吳
公治平為天下第一故與李斯同邑而常學事焉
徵為廷尉乃言賈生年少頗通諸子百家書文帝
召以為博士是時賈生年二十餘最為少每詔令
議下諸老先生不能言賈生盡為之對各如其意

所欲出諸生於是乃以為能不及也文帝說之超
遷一歲至太中大夫賈生以為漢興至孝文二十
餘年天下和洽當改正朔易服色壹制度定官名
興禮樂乃悉草具其事儀法色尚黃數用五為官
名悉更秦法文帝謙讓未遑也諸律令所更定及
列侯悉就國其說皆自賈生發之於是天子議以
賈生任公卿之位絳灌東陽侯馮敬之屬盡害之
乃短賈生曰雒陽之人年少幼學專欲擅權紛亂
諸事於是天子後亦疏之不用其議乃以賈生為
長沙王太傅賈生既辭往行聞長沙卑濕自以壽

不得長又以適去意不自得及渡湘水為賦以弔
屈原其辭曰恭承嘉惠兮俟罪長沙側聞屈原兮
自沉汨羅造託湘流兮敬弔先生遭世罔極兮乃
隕厥身嗚呼哀哉逢時不祥鸞鳳伏竄兮鴟梟鷄
翔鬪茸尊顯兮說諛得志賢聖逆喪兮方正倒植
世謂伯夷貪兮謂盜跖廉莫耶鈍兮鈇刀為鈇于
嗟嘿嘿兮生之無故幹棄周鼎兮而寶康瓠騰駕
罷牛兮驟蹇驢驥出兩耳兮服鹽車章甫薦屨兮
所不可久嗟苦先生兮獨離此咎訊曰已矣國其
莫我知獨埋鬱兮其誰語鳳漂漂其高邁兮失固

自縮而遠去襲九淵之神龍兮沕深潛日自珍
融爚以隱處兮夫豈從螳與蛭螾所貴聖人之神
德兮遠濁世而自藏使騏驥可得繫羈兮豈云異
夫犬羊般紛紛其離此尤兮亦夫子之辜也臆九
州而相君兮何必懷此都也鳳皇翔于千仞之上
兮覽德輝焉下之見細德之險微兮搖增翩逝而
去之彼尋常之汙瀆兮豈能容吞舟之魚橫江湖
之鱸鱠兮固將制於螻蟻曹生為長沙王太傅三
年有鴟飛入賈生舍止於坐隅乃為賦以自廣其
辭曰單閱之歲兮四月孟夏庚子日施兮服集子

舍止于坐隅貌甚間暇異物來集兮私怪其故發
 書占之兮策言其度曰野鳥入處兮主人將去請
 曰于鵬兮予去何之吉乎告我凶言其蓄淹數之
 度兮語予其期鵬乃歎息舉首奮翼口不能言請
 對以臆萬化變化兮固無休息幹流而遷兮或推
 而還形氣轉續兮化變而嬗沕穆無窮兮胡可勝
 言禍兮福所倚福兮禍所伏憂喜聚門兮吉凶同
 域彼吳疆大兮大差呂敗越棲會稽兮句踐霸世
 斯道遂成兮卒被五行傳說胥靡兮乃相武丁夫
 禍之與福兮何異糾纏命不一孰知其極水

激則旱兮矢激則遠萬物田薄兮振蕩相轉雲丞
 雨降兮錯繆相紛大專樂物兮塊軋無壞天不可
 與慮兮道不可與謀遲數有命兮惡識其時且夫
 天地為爐兮造化為工陰陽為炭兮萬物為銅合
 散消息兮安有常則千變萬化兮未始有極忽然
 為人兮何足控搏化為異物兮又何足患小知自
 私兮賤彼貴我通人大觀兮物無不可貪夫徇財
 兮烈士殉名夸者死權兮品庶馮生怵迫之徒兮
 或趨西東大人不曲兮億變齊同拘土繫俗兮摑
 如囚拘至人遺物兮獨與道俱衆人或或兮好惡

積意真人淡漠兮獨與道息釋知遺形兮超然自
喪寥廓忽荒兮與道翔翔乘流則逝兮得坻則止
縱軀委命兮不私與已其生若浮兮其死若休澹
乎若深淵之靜汎乎若不繫之舟不以生故自寶
兮養空而游德人無累兮知命不憂細故懲蓊兮
何足以疑後歲餘賈生微見孝文帝方受釐坐宣
室問鬼神之本賈生具道所以然之狀至夜半文
帝前席既罷曰吾又不見賈生自以為過之今不
及也居頃之拜賈生為梁懷王太傅懷王文帝少
子愛而好書故令賈生傳之文帝復封淮南厲王

子四人皆為列侯賈生諫以為患之興自此起矣
賈生數上疏言諸侯或連數郡非古之制可稍削
之文帝不聽居數年懷王騎墮馬而死賈生自傷
為傅無狀哭泣歲餘亦死賈生之死時年三十三
矣及孝文崩武帝立舉賈生之孫二人至郡守而
賈嘉最好學世其家

史南曰臣攷諸遷固諸史謂劉向稱賈誼通達
國體伊管未能過也使時見用功化必盛惜為
絳灌諸臣所嫉不得展其所施而卒抑之以死
悲夫李文正公撰長沙祠記畧云漢屈群策豪

傑並起高祖所不能致者商山四皓魯國兩生
天下無遺賢矣文帝時可當大臣者惟賈太傅
一人觀其論天下之所置則先仁義後刑法論
天下之勢則先夏後夷先要而後脛論吏治則
先風俗論大臣則先廉耻論世之所以治久長
則先太子此其言皆治亂大體戰國而下無能
言者當時乃以為少年紛更後之議者亦以為
大驟必有能辨之者使太傅竟作相必能割去
秦習成漢家制非蕭曹而下可擬也遷史以其
吊湘之賦與屈原同傳哀之甚矣今其宅為卒

伍所居其井固宛然存也嗟乎文正公可謂知
太傅而獨觀其深矣贊曰洛陽才人天挺神兮
長沙太傅地鍾靈兮浮湘作賦吊屈平兮上闕
獻策啓漢文兮宣室前席問鬼神兮絳灌諸臣
嫉紛更兮鳳巢麟藪高拂雲兮蘭紉蕙驥幽積
馨兮造物忌名志弗伸兮廟堂擯士國誰禎兮
井宅猶在茂樹森兮琬琰可傳永寶珍兮

蔡邕 邊讓

蔡邕字伯喈陳留圉人少師事南郡胡廣通天文數
術妙操音律尤長於辭章建寧三年出補河平長

召拜議郎校書東觀熹平四年詔同堂谿楊賜馬
日磾張馴韓說單颺等正定六經書冊立石召入
崇德殿問災異語在漢書後死于王允所著漢津
賦其辭曰夫何大川之浩浩兮洪流淼以玄清配
名位乎天漢披厚土而載形登源自乎嶓冢引漾
澧而東征納陽谷之所吐兮兼漢沔之殊名總畎
澮之群液演西土之陰精遇萬山以左迴兮旋襄
陽而南紫切大別之東山兮與江湘乎通靈嘉清
源之勢體兮澹澹湲湲以安流鱗甲育其類兮蛟龍
集以嬉遊明珠胎于靈蚌兮夜光潛乎玄洲雜神

寶其允盈兮豈魚龜之足收於是遊目騁觀南援
三州北集京都上控隴坻下接江湖導村運貨懋
遷有無既乃風焱蕭瑟勃焉並興陽侯沛以奔鶩
洪濤湧而沸騰頽乘流以上下窮滄浪乎三筮觀
朝宗之形兆看洞庭之交會

邊讓字文禮浚儀人也少辯博尤善屬文作章華臺
賦其辭曰楚靈王既遊雲夢之澤息於荆臺之上
前方淮之水左洞庭之波右顧彭蠡之隩南眺巫
山之阿延目廣望騁觀終日顧謂左史倚相曰盛
哉斯樂可以遺老而忘死也於是遂作章華之臺

築乾谿之室窮木土之技殫珍府之實舉國營之
數年乃成設長夜之淫宴作北里之新聲於是伍
舉知夫陳蔡之將生謀也乃作斯賦以諷之曰胄
高陽之苗胤兮承聖祖之洪澤建列藩於南楚兮
等威靈於二伯超有商之大彭兮越隆周之兩虢
達皇佐之高勳兮馳仁聲之顯赫惠風春旋神武
電斷華夏肅清五服攸亂且畱精於萬機兮夕停
輦於門館設長夜之歡飲兮展中情之嫵婉竭四
海之妙珍兮盡生人之祕玩爾乃携窈窕從好仇
徑肉林登糟立蘭肴山竦椒酒淵流激玄醴於清

池兮靡微風而行舟登瑤臺以回望兮冀彌日而
消憂於是招宓妃命湘娥齊倡列鄭女羅揚激楚
之清宮兮展新聲而長歌繁手超於北里妙舞麗
於陽阿金石類聚絲竹群分被輕挂曳華文羅衣
飄颻組綺續紛縱輕軀以迅赴若孤鷁之失群振
華袂以逶迤若遊龍之登雲於是歡燕既洽長夜
向半琴瑟易調繁音改彈清聲發而響激微曲逝
而流散振弱支而紆統兮若綠繁之垂幹忽飄颻
以輕逝兮似鸞飛於天漢舞無常態鼓無定節尋
聲響應修短靡跌長袖奮而生風清氣激而繞結

爾乃妍媚遽進巧弄相加俯仰異容忽兮神化體
迅輕鴻榮曜春華進如浮雲退如微波雖復柳惠
能不咨嗟於是天河既回淫樂未終清籥發徵激
楚揚風於是音氣發於絲竹兮飛響軼於雲中比
目應節而雙躍兮孤雌感聲而鳴雄美繁節之輕
妙兮嘉新聲之彌隆於是衆變已盡群樂既考歸
乎生風之廣廈兮修昔軒之要道携西子之弱腕
兮援毛嬙之素肘便娟以嬋媛兮若流風之靡草
美儀操之姣麗兮忽遺生而忘老爾乃清夜晨妙
技單收尊俎徹鼓盤悃焉若駐撫劔而歎慮理國

之須才悟稼穡之艱難美呂尚之佐周善管仲之
輔桓將超世而作理焉沉湎於此歡於是罷女樂
墮瑤臺思夏禹之卑宮慕有虞之士階舉英奇於
仄陋拔髦秀於蓬萊君明哲以知人官隨任而處
能百揆時叙庶績咸熙諸侯慕義不召同期繼高
陽之絕軌崇成莊之洪基雖齊桓之一匡豈足方
於大持爾乃育之以仁臨之以明致虔報於鬼神
盡肅恭乎上京登淳化於黎元永歷世而太平將
軍何進聞讓才名欲辟命之恐不至詭以軍事徵
召既致署令史讓善古射能辭對時賓客滿堂莫

不羨其風府掾孔融王朗並修刺候焉議郎蔡邕
深敬之以為讓宜處高任乃薦之曰幕府初開博
選清英華髮舊德並為元龜雖振鷺之集西雍濟
濟之在周庭無以或加竊見令史邊讓天授逸才
聰明賢智鬣鳳孤不盡家訓及就學廬便受大
典初涉諸經見本知義授者不能對其問章句不
能逮其意心通性達口辯辭長非禮不動非法不
言若處孤疑之論定嫌審之分經典交呈檢括參
合衆夫寂焉莫之舉奪使讓生在唐虞則元凱之
次運值仲尼則顏冉之亞豈徒俗之凡偶近器而
已哉階級名位亦宜超然若復隨輩而進非所以
章瓌偉之高價昭知人之絕明也傳曰函牛之鼎
以烹鷄多汁則淡而不可食少汁則熬而不可熟
此言大器之於小用固有所不宜也邕竊愴悵怪
此寶鼎未受犧牛六美之和爰在前熬鑿割之間
願裁加少納貢之機密展之力用若以年齒為嫌
則顏回不得貫德行之首子奇終無阿宰之功苟
堪其事古今一也讓後以高才擢進屢遷太守初
平中讓去官還家恃才不屈曹操多輕侮之操嘗
郡就殺之

史南曰臣讀范曄漢史乃見蔡邕上列七事旁著群篇率皆出乎衷素諧乎風雅既而閱中郎全集若登群玉之岫瑇瑁瓊瑀爛然照乘矣至誦其薦邊讓之劄則又虛已羨賢騰矧稱善此又文人所難企也邕既受狼噬于允而讓又遭虺毒于操豈天奪二子之速耶贊曰炎祚既微雲焰焚如若羽坑降若羸燬書中郎英挺承明直廬彥禮豪縱才庸識疎奸雄睥睨冊禁紫虛遺笈可誦石室當儲

王粲 彌衡

王粲字仲宣高平人獻帝西遷粲徙長安左中郎將蔡邕見而奇之時邕才學顯著車騎填巷賓客盈坐聞粲在門倒屣迎之粲至年既幼弱容狀短小一坐盡驚邕曰此王公孫有異才吾不如也吾家書籍文章盡當與之年七十司徒辟詔除黃門侍郎以西京亂不就乃之荊州依劉表表以粲貌寢而體弱不甚重也粲登荊州城樓撰登樓賦其辭曰登茲樓以四望兮聊暇日以銷憂覽斯宇之所處兮實顯敞而寡仇挾清漳之通浦兮倚曲沮之長洲背墳衍之廣陸兮臨臯隰之沃流北彌陶牧

西接昭丘華實蔽野黍稷盈疇雖信美而非吾土
兮曾何足以少留遭紛濁而遷逝兮漫踰紀以迄
今情眷眷而懷歸兮孰憂思之可任憑軒檻以遙
望兮向北風而開襟平原遠而極目兮蔽荆山之
高岑路透迤而修迥兮川既漾而濟深悲舊鄉之
壅隔兮涕橫墜而弗禁昔尼父之在陳兮有歸歎
之歎音鍾儀幽而楚奏兮莊鳥顯而越吟人情同
於懷土兮豈窮達而異心惟日月之逾邁兮俟河
清其未極冀王道之一平兮假高衢而騁力懼匏
瓜之徒懸兮畏井渫之莫食步棲遲以徙倚兮白

日忽其將匿風蕭瑟而並興兮天慘慘而亡色獸
任顧以來群兮鳥相鳴而舉翼原野闐其無人兮
征夫行而未息心悽愴以感發兮意切怛而憫惻
循階除而下降兮氣交憤於曾臆夜參半而不寐
兮悵盤桓以反側建安二十二年卒曹植誄曰猗
歟侍中遠祖彌芳公高建業佐武伐商爵同齊魯
邦祀絕亡流裔畢萬勳績惟先晉獻賜封于魏之
疆天開之祚末胄彌王厥性斯氏條分葉散世滋
芳烈揚聲秦漢會遭陽九炎光中矇世祖撥亂爰
建時雍三台樹位履道是鍾寵爵之加匪惠惟恭

自君二祖為光為龍僉曰休哉宜翼漢邦或統太
尉或掌司空百揆惟叙五典克從天靜人和皇教
遐通伊君顯考奕葉佐時入管機密朝政以治出
臨朔岱庶績咸熙君以淑懿繼此洪基既有令德
材技廣宣彌記洽聞幽讚微言文若春華思若涌
泉發言可詠下筆成篇何道不洽何藝不閑棋局
逞巧博奕惟賢皇家不造京室隕顛宰臣專制帝
用西遷君乃羈旅離此阻艱翕然鳳舉遠竄荆蠻
身窮志達居鄙行鮮振冠南嶽濯纓清川潛處蓬
室不干勢權我公奮鉞耀威南楚荆人或違陳戒

講武君乃義發筭我師旅高尚霸功投身帝宇
言既發謀夫是與是與伊何響我明德投戈編郡
稽顙漢北我公定嘉表揚京國金龜紫綬以彰勲
則勲則伊何勞謙靡已憂世忘家殊畧卓峙石署
祭酒與軍行止筭無遺策畫無失理我王建國百
司雋又君以顯舉秉機省闕戴蟬珥貂朱衣皓帶
入侍帷幄出擁華蓋榮耀當世芳風晻藹嗟彼東
夷憑江阻湖騷擾邊境勞我師徒光光戎路霆駭
風徂君恃華轂輝輝王塗思榮懷附望彼來威如
何不濟運極命衰寢疾彌留吉往凶歸經歷山河

泣涕如頽哀風與感行雲徘徊游魚失浪歸鳥忘
栖吾與夫子義貫丹青好和琴瑟分過友生庶幾
遐年携手同征如何奄忽棄我夙零我將假翼飄
飄高舉超登景雲要子天路虛廓無見藏景蔽形
孰云仲宣不聞其聲延首歎息雨泣交頸嗟乎天
子永安幽冥人誰不沒達士狗名生榮死哀亦孔
之榮

禰衡字正平原人少有才尚氣曹操欲見之不肯
往操懷忿欲殺之於是遣送劉表後復侮慢於表
表不能容江夏太守黃祖性急故送衡與之祖長

子射為章陵太守尤善於衡射太會賓客人有獻
鸚鵡者射舉札於衡前曰願先生賦之衡因為賦
筆不停綴文不加點其辭曰惟西域之靈鳥挺自
然之竒姿體金精之妙質含大德之明輝性辯慧
而能言号才聰明以識機故其嬉遊高峻栖峙幽
深飛不妄集翔必擇林紺趾丹觜綠衣翠衿采采
麗容皎皎好音雖同族於羽毛固殊智而異心配
鸞皇而等美焉比德於衆禽於是美芳聲之遠揚
偉靈表之可嘉命虞人於隴坻詔伯益於流沙跨
崑崙而播弋冠雲霓而張羅雖網維之備設終一

目之所加且其容止閒暇守植安停逼之不懼撫
之不驚寧順從以遠害不違忤以喪生故獻全者
受賞而傷肌者被刑爾乃歸窮委命離群喪侶閑
以彫籠翦其翅羽流飄萬里崎嶇重阻踰岷越障
載罹寒暑女辭家而適人臣出身而事主彼賢哲
之逢患猶棲遲以羈旅矧禽鳥之微物能馴擾以
安處眷西路而長懷望故鄉而延佇嗟祿命之衰
薄奚遭時之險巇豈言語以階亂將不密以致危
痛母子之永隔哀伉儷之生離匪餘年之足惜慙
衆雛之無知背蠻夷之下國侍君子之光儀懼名

實之不副耻才能之無竒羨西都之沃壤識苦樂
之異宜懷代越之悠思故每言而穉斯若乃少昊
司辰葶收整轡嚴霜初降涼風蕭瑟長吟遠慕哀
鳴感類音聲悽以激揚容貌慘以顛頓聞之者悲
傷見之者隕淚放臣為之屢歎棄妻為之歔歔感
平生之遊處顧堽麓之相湏何今日之兩絕若胡
越之異區順櫳檻以俯仰闢戶牖以踟躕想崑山
之高徵思鄧林之扶疏顧六駟之殘毀雖奮迅其
焉如心懷歸而弗果徒怨毒於一隅苟竭心於所
事敢懷惠而忘初託輕鄙之微命委陋賤之薄軀

期守死以報德其盡辭以效愚恃隆恩於既往庶
彌久而不渝孔融薦衡表曰竊見平原禰衡淑質
貞亮英才卓犖初涉藝文升堂覩奧目所一見輒
誦於口耳所暫聞不忘於心性與道合思若有神
弘羊潛計安世默識以衡準之誠不足怪忠果正
直志懷霜雪見善若驚疾惡若讐任座抗行史魚
厲節殆無以過也鷲鳥累百不如一鶚使衡立朝
必有可觀飛辯騁辭溢氣全通解疑釋結臨敵有
餘昔賈誼求試屬國詭係單于終軍欲以長纓牽
致勁越弱冠慷慨前世美之近日路粹嚴象亦用

異才擢拜臺郎衡宜與為比如得龍吟天衢浪翼
雲漢揚聲紫微雷光虹蜺足以昭近署之多士增
四門之穆穆鈞天廣樂必有奇麗之觀帝室皇居
必畜非常之寶若衡等輩不可多得激楚陽阿至
妙之容掌伎者之所貪飛兔騶馭絕足奔放良樂
之所急也試令衡以褐衣召見無可觀采臣等受
面欺之罪李白懷衡詩云魏帝營八極蟻觀一禰
衡黃祖斗筭人殺之受惡名漢江賦鸚鵡落筆超
群英鏘鏘振金玉句句欲飛鳴鷲鷲啄孤鳳千春
傷我情五岳起方寸隱然詎可平才高竟何施寡

識骨天刑至今芳洲上蘭蕙不敢生

史南曰臣幼誦文選至仲宣正平之賦未嘗不

泫然悲焉夫自董卓稱兵塵蒙炎闕曹瞞窺鼎

血染神州繁避居荆土終踐台階衡擣藻漢江

卒投鈇鑕至今誦其辭賦猶有餘音焉豈造物

忌名故耶賡曰荆門煙樹楚江汀蘭公子興哀

玉孫流翰登樓傑作光昭星垣賦渚麗辭文灑

波瀾

張說 張九齡

張說字道濟洛陽人永昌中舉賢良方正中宗立授

兵部員外郎累遷黃門侍郎兼修文館學士睿宗

即位擢中書侍郎玄宗為太子說與褚无量侍讀

尤見親禮踰年同平章事監修國史素與姚元崇

不協罷為相州刺史徙岳州說既失執政意內自

懼雅與蘇瓌善時瓌子頲為相因作五君詠獻頲

其一紀瓌也頲覽詩嗚咽見帝陳說忠蹇有勲遂

遷荊州長史入朝帝大喜授檢校并州長史召拜

兵部尚書同中書門下三品十七年復為丞相上

日勅所司供帳設樂內出醪饌賦詩賜之尋授開

府儀同三司十八年卒贈太師謚曰文貞初寓岳

州詩曰夜夢雲關門從容簪履列朝遊洞庭上緬
望京華絕潦收江未清火退山更熱重歛視欲醉
憎滿氣如噓器留魚鱉腥衣點蚊蚩血髮白思益
壯心玄用彌拙冠劍日苔蘚琴書坐廢撤惟有報
恩字刻意長不滅又汎洞庭詩曰緬邈洞庭岫恣
蒙水霧色宛在太湖中可望不可即剖竹守窮渚
開門對竒域城池自籠密纓綬為微繫靡日不思
往經時始願克飛棹越溟波維舟恣攀陟窳窳入
雲步崎嶇倚松息巖壇有鶴過壁字無人識滴石
香乳溜垂崖露草吐一玩幽輕霧阻討異志曠逼寒

沙際水平霜樹籠煙直空宮闕莫覩地迫窺難測
此處學金丹何人生羽翼誰傳九光要幾拜三仙
術紫氣徒想象清潭長眇然霓裳若有來觀我雲
峰側先是有張公謹字弘慎高祖時改襄州都督
以惠政聞

張九齡字子壽韶州曲江人七歲知屬文擢進士始
調校書郎以道侔伊呂科策高第為左拾遺俄遷
左補闕改司勳負外郎時張說為宰相親重之與
通譜系遷中書舍人內供奉封曲江男會帝封泰
山擢九齡為太常少卿集賢院學士遷工部侍郎

知制誥九齡坐舉周子諒貶荊州長史久之封始
興伯卒贈荊州大都督謚曰文獻初九齡寓荊州
登郡樓詩曰天宇何其曠江城坐自拘層樓百餘
尺迢遰在西隅暇日時登眺荒郊臨故都纍纍見
陳跡寂寂想雄圖古往山川在今來郡邑殊北疆
雖入鄭東距豈妨吳幾代傳荆國當時敵陝鄂上
流空有處中土復何虞枕席夷三峽關梁豁五湖
承平無異境守隘莫論夫自罷金門籍來叅竹使
符端居向林藪微尚在桑榆直似王陵慙非如甯
武愚今茲對南浦乘鴈與雙鳧又發江陵詩曰極

望涪陽浦江天眇不分扁舟從北去鷗鳥自為群
他日懷真賞中年負俗紛適來果微尚倏爾會斯
文復想金閨籍如何夢渚雲我行多勝寄浩思獨
氤氳又有張署者謫知臨武韓愈令陽山與之邂逅

史南曰臣攷諸唐書編說在玄宗時納忠惓惓
開元文物說力居多但以不協于姚崇故排擯
幾不能免然能知九齡之賢而薦之視媚嫉者
不倫矣况其履郡揮毫汎湖流詠體裁爾雅格
韻高曠有足誦說者乎君子不以一眚掩衆美

故仍其舊相位居前而以九齡並見云贊曰唐
至開元詩稱盛時燕公秀挺岳陽摛詞文獻忠
貞曲江構祠薦賢上賞詆奸勿疑二張同傳豈
直曰私

韓愈

韓愈字退之南陽人七世祖茂封安定王父仲卿為
武昌令有美政既去縣人刻石頌德終秘書郎愈
生三歲而孤隨伯兄會貶官嶺表愈自知讀書日
記數千百言比長通六經百家學擢進士第董晉
為宣武節度使表署觀察推官武寧節度使張建

封辟府推官調四門博士遷監察御史上疏極論
宮市德宗怒貶陽山令改江陵法曹叅軍元和初
權知國子博士分司東都改都官員外郎拜河南
令遷職方員外郎華陰令復為博士改比部郎中
史館修撰轉考功知制誥進中書舍人憲宗將平
蔡命御史中丞裴度按視愈所言與度合由是改
太子右庶子及度宣慰淮西奏愈行軍司馬元濟
平遷刑部侍郎時迎佛骨入禁中三日愈上表極
論帝大怒貶潮州刺史久之召拜國子祭酒轉兵
部侍郎鎮州亂殺田弘正而立王廷湊詔愈宣撫

語在愈傳帝聞而壯之轉吏部侍郎宰相李逢吉
惡李紳欲逐之以愈為京兆尹兼御史大夫復為
吏部侍郎長慶四年卒年五十七贈禮部尚書謚
曰文愈性明銳不詭隨與人交始終不少變成就
後進多知名經愈指授皆稱韓門弟子每言文章
自漢司馬相如太史公劉向揚雄後作者不世出
故深探本原卓然樹立成一家言其原道原性師
說等數十篇皆奧衍闊深與孟軻揚雄相表裏而
佐佑六經云初貶潮陽至衡州登祝融峯山雲為
開霽其詩云五嶽祭秩皆三公四方環峙嵩當中

火維地荒足妖怪天假神柄專其雄噴雲泄霧藏
半腹雖有絕頂誰能窮我來正逢秋雨節陰氣晦
昧無清風潛心默禱若有應豈非正直能感通須
吏靜掃衆峯出仰見突兀撐青空紫蓋連延接天
柱石廩騰擲堆祝融森然魄動下馬拜松栢一逕
趨靈宮粉墻丹桂動光彩鬼物圖書填青紅升階
偃僕薦脯酒欲以菲薄明其衷廟令老人識神意
睢盱偵伺能鞠躬手持杯琖導我擲云此寂吉餘
難同竄逐蠻荒幸不死衣食纔足甘長終侯王將
相望又絕神縱欲福難為功夜投佛寺上高閣星

月掄映雲腫臃猿鳴鍾動不知曙杲杲寒日生於
東又登岳陽樓詩曰洞庭九州間厥大誰與讓南
匯群崖水北注何奔放渚為七百里吞納各殊狀
自古澄不清環混無歸向炎風日搜攪幽怪多冗
長軒然大波起宇宙隘而妨巍峩拔嵩華騰蹕較
健壯聲音一何宏轟輻車萬兩猶疑帝軒轅張樂
就空曠蛟螭露筍簾縞練吹組帳鬼神非人世節
奏頗跌踢陽施見誇麗陰閉感悽愴朝過宜春口
極北缺堤障夜纜巴陵洲叢芮纒可傍星河盡涵
泳俯仰迷下上餘瀾怒不已喧聒鳴甍盜明登岳

陽樓輝煥朝日亮飛廉戢其威清晏自織縵澄
湛凝綠物影巧相况江豚時出戲驚波忽蕩漭時
當冬之孟隙空縮寒漲前臨指近岸側坐眇難望
滌濯神魂醒幽懷舒以暢主人孩童舊握手乍忻
悵憐我竄逐歸相見得無恙開筵交履舄爛漫倒
家釀盃行無留停高柱送清唱中盤進橙栗投擲
傾脯醬歡窮悲心生婉孌不能忘今昔始讀書志
欲干霸王屠龍破千金為藝亦云亢愛才不擇行
觸事得讒謗前年出官由此禍敢無妄公卿採虛
名擢拜識天仗女奴猜畏彈射斥逐恣欺誑新恩移

府庭逼側則諸將吁嗟若鶩緩但懼失宜當追思
南渡時魚腹甘所葬嚴程迫風帆劈箭入高浪顛
沉在湏臾忠鯁誰復諒生還真可喜克已自懲創
庶從今日後麤識得與喪事多改前好趣有獲新
尚誓耕十畝田不取萬乘相細君知蠶織稚子已
能夠行當掛其冠生死君一訪

史南曰臣攷諸唐書云愈以六經之文為諸儒
倡障隄末流反利以樸剗偽以真其所得粹然
一出於正至進諫陳謀排難卹孤矯拂餘未皇
皇于仁義可謂篤道君子矣及觀程子稱其為

豪傑原道之作誠有所見朱子稱其資才甚高
立朝議論風采可觀惟真德秀曰其語道也其
分不離父子君臣其法不過禮樂刑政飲食喪
葛即正理所存斗斛權衡亦至教所寓道之大
用粲然復明者韓子之功也蘇軾撰廟碑詞曰
公昔騎龍白雲鄉手抉雲漢分天章天孫為織
雲錦裳飄然乘風來帝旁下與濁世掃粃糠丙
游咸池畧扶桑草木衣被昭回光追逐李杜參
翺翔汗流籍湜走且僵滅沒倒景不可望作書
詆佛譏君王要觀南海窺衡湘歷舜九疑弔英

皇祝融先驅海若藏約束鮫鱈如驅羊鈞天無人帝悲傷謳吟下招遣巫陽犧牲鷄卜差我觴於粲荔丹與焦黃公不少留我涕滂翩然披髮下大荒

柳宗元

柳宗元字子厚其先河東人從曾祖奭為中書令父鎮擢殿中侍御史宗元少精敏絕倫為文章卓偉精織第進士博學宏辭科授校書郎調監田尉貞元十九年為監察御史裏行王叔文帝執誼奇其才引內禁近與計事擢禮部員外郎欲大進用俄

而叔文敗貶邵州刺史不半道貶永州司馬既竄斥地又荒厲因自放山澤間其堙厄感鬱一寓諸文倣離騷數十篇讀者咸悲惻其寓永州登三亭眺萬石關愚谷游黃溪記鈇鉏潭志鐵爐步與夫石澗乳穴諸作若捉龍蛇捕虎豹紛然奇矣登西山詩云鶴鳴楚山靜露白秋江曉連袂度危橋縈迴出林抄西岑極遠目毫末皆可了重疊九嶷高微茫洞庭小迥窮兩儀際高出萬象表馳景泛頽波遙風迎寒篠謫居安所習稍厭從紛擾生同胥靡遺壽等彭鏗天蹇連困顛踣愚蒙怯幽眇非令

親愛踈誰使心神悄偶茲遁山水得以觀魚鳥吾
子幸淹留緩我愁腸繞遊南亭詩曰夙抱丘壑尚
率性資遊遨中為吏役牽十祀空怕勞外曲徇塵
轍私心寄英髦進之廊廟器退非鄉曲豪天命斯
不易鬼責將安逃屯難果見凌剝喪宜所遭神期
固浩浩衆口徒嗷嗷投跡山水地放情詠離騷再
懷曩歲期容與馳輕舸虛館背山郭前軒面江臯
重疊間浦淑遷迤驅巖藪積翠浮澹灩始疑負靈
鼈叢林留衝飈石礫迎飛濤曠朗天景霽樵蘇遠
相號澄潭湧沉鷗半蹙趾懸猿鹿鳴驗食野魚樂

知觀濠孤賞誠所悼暫欣良足哀留連俯橋檻注
我壺中醪乃亦願進菜實濯手持蟹整炊稻視饜鼎
鱠鮮聞操刀野蔬盈傾筐頗雜池沼毛緬慕鼓枻
翁嘯咏哺其糟退想於陵子三咽資李膺斯道難
為惜沉憂安所誦曲渚恣鴻鵠環洲彫蘭皇暮景
迴西岑北流逝滔滔徘徊遂昏黑遠火明連艘木
落寒山靜江空秋月高飲伏戒遷徙善游於所操
趣淺戢長柁乘深屏輕篙曠望接深竿哀歌叩鳴
舳中川恣超忽漫若翔且翔淹泊遂所止野風自
迴颺澗急驚鱗奔蹊荒饑獸嗥入門守拘繫悽戚

增鬱陶慕士情未忘懷人首徒搔內顧乃無有德
輔甚鴻毛名竊又自欺食浮固云叨問牛悲爨鍾
說颯驚臨牢永道刀筆吏寧期簿書曹中興遂群
物裂壤分韃橐岷凶既云捕吳虜亦已鑿扞禦盛
方虎謨明富伊咎披山窮木禾駕海逾蟠桃重來
越裳雉再返西旅葵左右抗梗棘縱橫羅鴈羔三
辟咸肆宥衆生均覆燾安得奉皇靈在宥解天駘
歸誠慰松梓陳力開蓬蒿下室有鄆杜名田占澧
澇磻谿近餘基阿城連故濠螟蚺頭親燎荼董甘
自薶饑食期農耕寒衣俟蠶繰及胥足為溫清腹

寧復號要將蒯及管誰慕梁與膏弋林毆雀鷄釣
澤從鮑劔觀象嘉素履陳詩謝干旄方託麋鹿群
敢同騏驎槽處賤無溷濁固窮匪淫怕踉蹌辭束
縛悅懌換煎熬登年徒負板興役趨伐藜目眩絕
渾渾耳喧息嘈嘈茲焉畢餘命富貴非吾曹長沙
哀紉纏漢陰嗤桔槔苟伸擊壤情幾事息秋毫海
霧多莽鬱越風饒腥臊寧懼迫魑魅所傷齊君庶
知瑩懷褚中范叔戀綿袍伊人不可期慷慨徒切
切

史南曰三代之後無文人六經之外無文法非

文之難也文載乎道之難也世之稱唐大家者
 必曰韓柳以今觀之高山大川雄峙奔洶雖不
 見其震駭湮塞而其秀挺迴紆不可盡藏韓之
 文也巍巖絕湍峭竒環曲使人遐眺留睨而其
 靈氛怪氣罔克籠罩柳之文也又如平原曠野
 大將指麾天衝地衝自有紀律其韓之變乎間
 道斜谷驚飈掣電不可方物其柳之變乎昌黎
 銘曰嗟嗟子厚而至然耶自古莫不然我又何
 嗟人之生世如夢一覺其間利害竟亦何校當
 其夢時有樂有悲及其既覺豈足追惟凡物之
 生不願為材犧尊青黃乃木之災子之中棄六
 脫馬羈玉佩瓊瑤大放厥辭富貴無能磨滅誰
 紀子之自著表表愈偉不善為匠斷指汗顏巧
 匠旁觀縮手袖間子之文章而不用世乃令吾
 徒掌帝之制子之視人自以無前一斥不復群
 飛刺天嗟嗟子厚今也則忘臨絕之音一何琅
 琅偏告諸友以寄厥子不鄙謂余亦記以死凡
 今之交觀勢厚薄余豈可保能承子託非我知
 子子實命我猶有鬼神寧敢遺墮

歐陽修

歐陽修字永叔廬陵人修舊隨叔父暉游宦于隨得
韓愈遺文于書麓中誦習悅慕至忘寢食天聖八
年進士試南宮第一擢甲科調西京推官始從尹
洙梅堯臣游為館閣校勘范仲淹以言事貶在廷
多論救司諫高若訥獨以為當黜修貽書責之訥
上其書坐貶夷陵到州上運使啓云修近以狂言
當蒙大譴得一邑以庇身使之思過竊三鍾而就
養猶足為榮乃撰至喜堂記以自慰因取舊案反
覆觀之見其枉直乖錯不可勝數仰天歎曰以荒
遠小邑且如此天下固可知自爾遇事不敢忽也

學者未見所與言未普及文章惟談吏事謂文章
止於潤身政事可以及物不涉他務再徙亳州又
之復集賢校理慶歷三年知諫院時仁宗更用大
臣杜衍富弼韓琦范仲淹皆在位增諫官員用天
下名士脩首在選進朋黨論帝獨獎其敢言賜五
品服顧侍臣曰如歐陽修者何處得來同修起居
注遂知制誥禮部侍郎叅知政事修唐書修力求
退罷為觀文殿學士刑部尚書明年遷兵部修以
風節自持既數被汙讎年六十即連乞謝事帝優
詔弗許及為安石所詆求歸愈切熙寧四年以太

子少師致仕五年卒贈太子太師謚曰文忠隨州
有李公佐東園記荊州有游儵亭記岳州有偃虹
堤記永州有萬石亭記衡州有送廖倚序有送劉
學士詩辰州有南徭詩襄陽有峴山亭記具載全
集初蒞夷陵寄蘇子美詩云三峽倚岩堯同遷地
最遙物華雖可愛鄉思獨無聊江水流清嶂猿聲
在碧霄野篁抽夏筍叢橘長春條未臘梅先發經
霜葉不凋江雲愁蔽日山霧晦迷朝斫谷爭收漆
梯林鬪摘椒巴賓船賈集蠻市酒旗招時節同荆
俗民風載楚謠俚言成調笑祭鬼聚喧囂得罪宜

投裔包羞分折腰光陰催晏歲牢落慘驚臆白
新年出朱顏異域銷縣樓朝見虎官舍夜聞鷄守
信無秋鴈思歸望斗杓須知千嶂裏長繞洛川橋
岳陽樓寄滕子京詩云峭巖孤城倚平湖遠浪來
萬尋迷島嶼百仞起樓臺太守凭闌處群賢奉笏
陪清霜薦丹橘積雨過黃梅逸思歌湘曲道文繼
楚才魚貪河岫樂雲望帝鄉迴遙信雙鴻下新緘
尺素裁因聞誇野境自笑擁邊埃龍漢方多孽旄
頭又示災旌旗時映日鼙鼓或驚雷有志皆嘗膽
何人可鑿坏儒生半校筆收豎亦輸財沮澤辭猶

漫蒲萄館未開支離莫攘臂天子正求才

史南曰臣幼誦歐陽文忠公文以為蘇長公稱其為宋之韓愈也然而昌黎能排閭闔于禁中迎佛骨之時而永叔未免依違于濮園上冊寶之日昌黎能逐鰐魚于潮陽海濤之時而永叔未免嗟嘆于夷陵悲南潦之日昌黎能作原道以闢諸家之邪議而永叔未免溺于文詞以來諸儒之衆論長公譬之深淵大澤龍亡虎逝變怪雜出舞魍魎而號狐狸蓋有所感矣朱子有言韓無心變歐有心變其定論矣乎韓魏

公銘墓曰噫公之節其剛烈烈彌遠斥姦義不可折噫公之文天資不群光輝古今左右典墳直道而行屢以讒蹶卒悟而知惟帝之哲升贊機務方隅以寧參議大政社稷是經成此王功大忠以効德高毀及退不吾較公之來歸既安且怡宜報以壽矣也何為公文在人公迹在史茲惟不窮亘千萬祀蘇子由銘神道曰於穆仁宗有臣文忠自險而夷保其初終惟古君臣終之實難匪不用賢有孽其間公奮自南聲被四方允文且忠有偉其光上實闢之下實泥之三

起三僨誰實使之僨而復全惟天子明克明克
忠乃卒有成逮歲嘉祐君臣一德左右天造民
用飲食舜禹相授不改舊服白髮蒼顏翼然在
廷功成而歸維公本心彼其何如言恐不深穎
水之濱甲第朱門新鄭之墟茂木高墳野人指
之文忠之遺忠臣不危仁祖之思

蘇軾

蘇轍

黃庭堅

蘇軾字子瞻眉山人嘉祐二年試禮部時文磔裂詭
異歐陽修思有以救之得軾刑賞忠厚論驚喜欲
擢冠多士疑其客曾鞏所為實第二復以春秋對

義居第一殿試中乙科後以書見脩脩語梅聖俞
曰吾當避此人出一頭地調福昌簿啓試秘閣除
大理評事鳳翔判官治平二年英宗聞其名欲召
入翰林韓琦曰軾遠大器也他日自當為天下用
要在朝廷培養之使天下之士莫不畏慕然後取
而用之則人無復異辭矣遂直史館新法行軾極
論其不可王安石滋怒使御史謝景溫論奏其過
窮治無所得軾遂請外通判杭州徙知徐州又徙
湖州以事不便民者不敢言以詩託諷御史李定
舒亶何正言撫其語媒孽訛謗逮赴臺獄欲寘之

死鍛鍊久之不決神宗獨憐之謫黃州團練副使
安置軾與田父野老相從溪山間築室於山中號
東坡居士謝表云臣早緣科第誤忝縉紳親逢睿
哲之興遂有功名之意召對便殿考其所學之言
試守三州觀其所行之實而臣用意過當日趨于
迷茫如醉夢之中不知言語之出至仁屢赦衆論
不容豈謂尚玷散員更以善地投畀磨廳之野保
全樗櫟之生三年神宗數有意復用輒為當路者
所沮嘗語宰相王珪蔡確曰國史至重可命蘇軾
成之珪有難色神宗曰軾不可姑用魯鞏鞏進太

祖總論神宗意不允遂手札移軾汝州有曰蘇軾
黜居思咎閱歲滋深人材實難不忍終棄元祐元
年軾以七品服入侍延和郎賜銀緋遷中書舍人
尋除翰林學士二年兼侍讀每進讀至治亂盛衰
邪正得失之際未嘗不反覆開導觀有所啓悟哲
宗雖恭默不言輒首肯之軾嘗鎖宿禁中召對便
殿宣仁后問曰卿前年為何官曰臣為黃州團練
副使曰今何官曰臣今待罪翰林學士曰何以遂
至此曰遭遇太后皇帝陛下曰非也曰豈大臣論
薦乎曰亦非也軾驚曰臣雖無狀不敢自他途以

進曰先帝每誦卿文章必嘆曰奇才奇才但未及
進用卿耳軼不覺哭失聲宣仁后與哲宗亦泣左
右皆感涕已而命坐賜茶徹御前金蓮燭送歸院
三年權知禮部貢舉以弟轍除右丞改翰林承旨
紹聖初御史論其謗訕貶英州徙惠州又徙昌化
徽宗立改永州團練使其寓黃州有赤壁賦有雪
堂詩武昌有游西溪詩有銅劍歌有與廖明叟書
興國有銀山詩襄陽有樂府荆門有惠泉詩巴東
有吊萊公詩長沙有春暉亭詩具載全集惟吊屈
原廟賦其辭曰泛扁舟以適楚兮過屈原之遺宮

覽江上之重山兮曰惟子之故鄉伊昔放逐兮渡
江濤而南遷去家千里兮生無所歸而死無以為
墳悲夫人固有死固有一死兮處死之為難徘徊
江上欲去而未決兮俯干仞之驚湍賦懷沙以自
傷兮嗟子獨何以為心忽終章之慘烈兮逝將去
此而沉吟吾豈不能高舉而遠逝兮又豈不能退
默而深居獨嗷嗷其怨慕兮恐君臣之愈疎生既
不能力爭而強諫兮死猶冀其感發而改行苟宗
國之顛覆兮吾亦獨何愛於父生託江神以告寃
兮馮夷教之以上訴歷九關而見帝兮帝亦悲傷

而不能救懷瑾佩蘭而無所歸兮獨惇惇乎中浦
峽山高兮崔嵬故居廢兮行人哀子孫散兮安在
况復見兮高臺自子之逝今千載兮世愈狹而難
存賢者畏譏而改度兮隨俗變化斲方以為圓電
勉於亂世而不能去兮又或為之臣佐變丹青於
玉瑩兮彼乃謂子為非智信高節之不可以企及
兮宜大人之不吾與違國去俗死而不顧兮豈不
足以免於後世嗚呼君子之道豈必全身遠害亦
或然兮嗟子區區獨為其難兮雖不適中要以為
賢兮夫我何悲子所安兮

史南曰漢稱賈董唐稱韓柳宋稱歐蘇夷攷其
時賈誼為長沙傳董仲舒為江都傳韓愈有潮
陽之謫柳宗元有永州之貶歐陽修有滁州之
役蘇軾始以詩詞遠斥三州終以譏訕連擯五
嶺豈其智弗若與然而名重當時文傳後世望
之若景星卿雲不可恒有而彼都顯位食豐祿
以保全其榮利譖毀夫英義者不啻蚊蚋之與
螭蝨也以此較之孰為得失嗟乎可與知者道
豈俗夫所可語哉第輟銘其墓曰蘇自欒城西
宅于眉世有潛德而人莫知猗與先生名施四

方公幼師兮其學有光出而從君道直言忠行
險如夷不謀其躬英祖擢之神考試之亦既知
矣而未克施晚侍哲皇進以詩書誰實間之一
斥而疏公心如玉焚而不灰不變生死孰為去
采古有微言衆說所蒙手發其樞持此以終心
之所涵遇物則見聲融金石光溢雲漢耳目同
是舉世畢知欲造其淵或眩以疑絕學不繼如
已斷絃百世之後豈其無賢我初從公賴以有
知撫我則兄誨我則師皆遷于南而不同歸天
寔為之莫之我哀宋孝宗御製文集贊曰維古

文章言必已出綴詞緝句文之蠹賊手扶雲漢
幹造化機氣高天下乃克為之倚嗟蒼人冠冕
百代忠言謹論不顧身害凜凜八節見於立朝
放浪嶺海侶于漁樵歲晚歸來其文益偉波瀾
老成無所附麗昭晰無疑優游有餘跨唐越漢
自我師模賈馬豪奇韓柳雅健前哲典刑未足
多羨敬想高風恨不同時掩卷二嘆播以聲詩

蘇轍

黃庭堅

曾鞏

蘇轍字子由年十九與兄軾同舉進士授商州推官
時父洵被命修禮書轍就養京師神宗立上書言

事召對延和殿時王安石設三司條例官命轍為之轍與呂惠卿議不協又坐兄軾以詩獲罪謫監筠州酒稅元祐元年起為司諫累官吏部尚書哲宗時又上疏論事落職知汝州徙袁州又責化州徽宗即位移永州及岳州而軾寓黃州有張夢得者為齊安令軾題其亭曰快哉轍撰記曰江出西陵始得平地其流奔放肆大南合湘沅北合漢沔其勢益張至於赤壁之下波流浸灌與海相若清河張君夢得謫居齊安即其廬之西南為亭以覽觀江流之勝而余兄子瞻名之曰快哉蓋亭之所

見南北百里東西一舍濤瀾洶湧風雲開闔畫則舟楫出沒於其前夜則魚龍悲嘯於其下變化倏忽動心駭目不可久視今乃得翫之几席之上舉目而足西望武昌諸山岡陵起伏草木行列煙消日出漁父樵夫之舍皆可指數此其所以快哉者也至於長洲之濱故城之墟曹孟德仲謀之所睥睨周瑜陸遜之所騁騫其流風遺俗亦足以稱快世俗昔楚襄王從宋玉景差於蘭臺之宮有風颯然至者王披襟當之曰快哉此風寡人所與庶人共者耶宋玉曰此獨大王之雄風耳庶人安得共

之夫風無雄雌之異而人有遇不遇之變楚王之
所以為樂與庶人之所以為憂此則人之變也而
風何與焉士生於世使其中不得自將何往而非
病使其中坦然不以物傷性將何適而非快今張
君不以謫為患竊會計之餘工而自放山水之間
此其中宜有以過人者將蓬戶甍牖無所不快而
况乎濯長江之清流揖西山之白雲窮耳目之勝
以自適也哉不然連山絕壑長林古木振之以清
風照之以明月皆騷人思士之所以悲傷憔悴而
不能勝者烏觀其為快也哉

黃庭堅字魯直分寧人舉進士調葉縣尉熙寧初授
北京國子監知太和縣哲宗立召為校書郎踰年
遷著作佐郎加集賢校理實錄成擢起居舍人初
出知宣州改鄂州章惇蔡卞與其黨論實錄多誣
其所作荆南承天院記指為幸災復除名羈管宣
州三年徙永州卒年六十一庭堅與張耒晁補之
秦觀廖明畧俱游蘇軾門下而庭堅於文章尤長
於詩其族黃芾字子耕舉進士知廬陽五溪獠叛
芾以詩諭之獠知嚮化芾亦有文庭堅初寓鄂有
次蘇軾西山詩有寄廖明畧詩沔陽有寄初和父

詩衡山有天保松銘通城有資深堂記其吊周濂
溪詞云溪毛秀兮水清飯羨兮濯纓不漁民利兮
又何有於名絃琴兮觴酒寫溪聲兮延五老以為
壽蟬蛻塵埃兮玉雪自清聽潺湲兮鑒澄明激奮
兮敦薄非青蘋白鷗兮誰與同樂又曰津有舟兮
蕩有蓮勝日兮與客就閒人聞擘音兮不知何處
散髮醉兮高荷為蓋兮倚芙蓉以當伎霜水寒兮
舟著平沙八方同宇兮雲月為家懷連城兮珮明
月魚鳥親人兮野老同社而爭席白雲家頭兮與
南山為伍非夫人攘臂兮誰余敢侮

曾鞏字子固南城人嘉祐二年進士調太平州司法
叅軍歲餘召直史館集賢校理出判越齊二州徙
知襄州宜城有長渠者水出于荆于康狼在春秋
謂之鴈在晉謂之夷即屈瑕伐羅及鴈白起為渠
引鴈地也宋至和間宜城令孫永濬之鞏為記且
襄有大獄久不決鞏立決闔境稱其明焉登峴山
詩云維舟沔南岬置酒峴山堂入座松雨濕吹衣
水風涼煙嶺火明滅秋濤聲激揚乍釋塵垢汗况
餘燈燭光羊公昔宴客為樂未遽央而我獨今夕
携家對壺觴頓適麋鹿性頓驚清興長歸去尚酩

酹詎期誇阿強其游鹿門詩云方舟下秋瀨已遠
 漢南城念昔在郡日苦為塵網嬰低心就薄祿實
 負山水情鹿門寂秀發十里行松檉宿幌白雲影
 入窓流水聲龐公昔抱道避世此躬耕風雨塞天
 地伺晨獨先鳴故巖但聞說已覺醒朝醒及茲道
 途遠謂諧猿鶴迎顧值深潭阻獨憐幽思拜不踏
 蘇嶺石虛負襄陽行鞏文訪隆中吊諸葛亮躡漢
 廣懷劉景升故其謝表有云出觀羨俗允多漢廣
 之高入奉慈顏下閔汝墳之瘁永念沉碑之舊未
 忘投博之勤熙豐六年卒

史南曰臣誦曾鞏文集見其有志曰道與歐陽
 公同郡且同志也故聶大年稱之曰曾子文章
 世希有水之江漢星之斗陳師道亦曰精爽回
 長夜衣冠出廣庭可謂知之深矣韓維撰神道
 銘詞曰猗嗟子固文與質生不勤其師幼則大
 成學富行茂其蓄彌彌發為文章一世大驚哲
 人既萎邪說嚙吠公不聽瑩徑前無闕矻廢藥
 瘍扶昏剔瞖波濤沅公東入于海姬淪劉亡文
 弊辭靡引商召羽偶六駢四組繡芬葩不見粉
 米公于其間奮揚虎視發揮興雅揀斥浮累巍

然高山為衆仰止栖遲掾曹翱翔書府如鷲之
 鷄如薪之楚一麾出守六上郡計振張領目補
 葺利弊庭不留訟獄無濫繫勞之來之鰥寡以
 遂公殿海服有命來觀帝曰汝賢毋遠王室其
 代予言汝且輔弼五聖大典惟公細繹百官正
 名惟公訓勅忠言嘉謀入則造膝公用不既公
 志不卒偉望廣譽如星如日石可磷兮公名不
 沒

劉放

秦觀 張來

劉放字貢父與兄敞同登科仕州縣二十年始為國

子監直講肥寧中判尚書考功同知太常禮院坐
 黜監衡州倉哲宗初起知襄州入為秘書少監加
 直龍圖閣元祐初歷度支左司郎中起居郎天章
 待制樞密都承旨權戶部尚書七年拜樞密直學
 士紹聖中以端明殿學士居郴州撰秩懷賦其辭
 曰世量力以為智兮孰不自師其成心不強短以
 比修兮亦各濟其所存蓋周任之明清兮予當服
 於德音性專直其似愚兮遂底滯而廢沈惟古人
 有不遇兮亦奚慨於斯今昔就冠而從仕兮冀陳
 力而帥職何日月之不淹兮疊疊至乎不惑世與

我其弗衷兮增余懷之默默數廢日而倍參兮願
自竭而安得將奔而及事兮愧初心而變色譬游
者之無術兮念愈躁而逾沒荷衆賢之并容兮曾
芥善之不遺辱興廉之末舉兮遂以造夫攸司君
之門不可以徑入兮既待詔而歷時唯褊心之猶
狹兮樂繩墨其自持誠詭遇其有獲兮雖得獸而
耻之信天命之有在兮非智勇其孰疑時既秋而
涼風兮草木落而衰日月麗於西廂兮蟋蟀迅而
鳴悲閱四序之代謝兮既逝者之如斯悼我心之
弗獲兮起惆悵而櫛詩

不中強志盛氣好大而見奇讀兵家書與已意合
見蘇軾於徐作黃樓賦以為有屈宋才削秩徙柳
州至嘉魚撰弔罇鐘文其辭曰嗚呼衆方之生謬
形殊器更首迭尾雌雄相廢朝為姜姬夕為樵悴
或奇偶之相續或九舛而一躓清餓和黜刑王眇
貴生犢失明得駿折髀洞所遇之參差奔循環於
一氣傳曰黃鍾毀棄瓦缶雷鳴余始以為疑今乃
信之矣嗚呼罇鐘何世所為質不呈剛形不露奇
協律中度渾如天資掩抑雖不見暇疵爰有兩

樂三十六乳厥音琅然小大隨叩曷所挺之瓌偉
而偶沉於幽陋辱泥塗之污漫厭鱗鬣之醒臭嗟
筍簋之一辭遽月絃之幾鼓幸陽愆而水涸天日
况其復覲調庭貢之是充獲效鳴於金奏何夜光
之暗投卒按劍而莫售嗚呼赤刀大訓天球河圖
秦壘漢劍趙璧隋珠捷犒之磬汾陰之鼎曲阜之
履天澤之弧歷世相傳以華國都下至威斗錯刀
羯鼓破鏡缺符遺簪墮珥信無益於經綸猶見收
於好事是鍾也郊廟所薦樂事紀綱統和元氣舞
獸儀凰令大河而更清使左角其不芒變化風俗

返乎羲皇而乃廢於深淵出而更清顧使黃鐘
協瓦缶齊鳴殆藻盤之不如矧牛鐸之敢兢此義
夫志士所為疾心而切齒也然余聞之金精之純
燥氣之齋雖從火革其質不變一晦一明昔者既
然僨而復起可無畢年嗚呼鐘乎今焉在乎豈復
為樂激宮流羽以嗣其故乎將憑化而遷改形易
制以周於用乎豈為錢為罇以供耕稼之職將為
鼎為鬲以效烹飪之功乎豈為浮圖老子之像巍
然瞻仰於緇素乎豈為麟趾裹蹄之形翕玩於邦
國乎豈為干將之劍氣如虹霓掃除妖氛於指顧

之間乎將為百燎之鑑湛如止水別妍醜於高堂
之上乎新故恒代未始云畢紛然殊途必有一出
決不泯泯草妖木孽嗚呼罇鐘又將奚卹

張耒字文潛淮陰人弱冠第進士歷臨淮簿壽安尉
咸平丞擢起居舍人紹聖初請郡以直龍圖閣知
潤州坐黨籍徙宣州謫監黃州酒稅徙復州徽宗
立起為通判黃州知兗州召為太常少卿甫數日
復出知潁州府監南獄廟主管崇福宮嘗著齊民
賦其詞曰仲夏之月陰氣始至剥陰反亨而
水伏畏涸火潦方熾其於人也

其弊惟人之生受命在子推卦曰坎五行為水微
陽所潛元氣之始故火甚烈則正氣或因而衰水
受害則君子之所深畏於是屏事燕息滌慮齊居
既靜事以為形又遠眺而高居却紛華而弗陳與
淡泊乎為徒絕嗜窒慾愛精畜神聲色不御滋味
宰親冲然與和俱遊湛兮以道合真故能體強志
寧愉樂壽考遠去疾厲保此難老嗚呼苟能推此
以盡道兮持此以察物豈惟齋戒以御時兮宜顛
沛而勿失且夫冰炭相乘利害交至隕真盜和豈
獨陰沴道心惟微易失難常困於侵陵有如微陽

則洗心滌志以却外垢虛中保和以全天君故能
涉至變而不濡更萬劫而常存蓋將窮年以齋居
豈特養生而善身未所著有文集數十卷

史南曰人有恒言德可強而能才不可強而至
豈其然乎夫蘊之為德行發之為文章措之為
事業其致一也故在聖門語德行則顏閔稱文
學則游夏豈聖人之道大而難兼哉自秦以降
聖學支離橫議並起若六子五子及七十二子
之文非不可觀但本真既亡輪轅徒飾實用益
鮮粉藻徒施故曰文王既沒文不在茲乎漢自

董賈而下至于唐初詞章茂衍著述繁布韓柳
以降歐蘇克紹皆名大家聲流金石曾鞏劉攽
則鼓篋于永叔之門秦觀張耒則濡毫于子瞻
之堂而黃庭堅則游息麗澤蘇轍則翱翔草池
彬彬乎一時之杰也胡可軒輕其間哉贊曰天
挺英豪地鍾秀靈永叔江鄉子瞻川瀆黃曾張
秦海內有名擗管瓊翰灑石瑤音穆如清風先
得我心

范仲淹

范仲淹字希文唐宰相履冰後也生二歲而孤母適

長山朱氏舊志宰安鄉故今安鄉有文正讀書院
仲淹舉進士第一初授廣德司理參軍晏殊薦為
秘閣校理出知蘇州召為天章閣待制知永興軍
元昊反拜樞密副使參知政事罷為陝西安撫使
徙荆南先是滕宗諒知岳州仲淹為撰岳陽樓記
曰慶曆四年春滕子京謫守巴陵郡越明年政通
人和百廢具興乃重修岳陽樓增其舊制刻唐賢
今人詩賦于其上屬予作文以記之予觀夫巴陵
勝狀在洞庭一湖銜遠山吞長江浩浩蕩蕩橫無
際涯朝暉夕陰氣象萬千此則岳陽樓之大觀也

前人之述備矣然則北通巫峽南極瀟湘遷客騷
人多會于此覽物之情得無異乎若夫霪雨霏霏
連月不開陰風怒號濁浪排空日星隱曜山嶽潛
形商旅不行檣傾楫摧薄暮冥冥虎嘯猿啼登斯
樓也則有去國懷鄉憂謫畏譏滿目蕭然感極而
悲者矣至若春和景明波瀾不驚上下天光一碧
萬頃沙鷗翔集錦鱗游泳岸芷汀蘭郁郁青青而
或長煙一空皓月千里浮光躍金靜影沉璧漁歌
互答此樂何極登斯樓也則有心曠神怡寵辱皆
忘把酒臨風其喜洋洋者矣嗟夫予嘗求古仁人

之心或異二者之為何哉不以物喜不以已悲居廟堂之高則憂其民處江湖之遠則憂其君是進亦憂退亦憂然則何時而樂耶其必曰先天下之憂而憂後天下之樂而樂歟噫微斯人吾誰與歸厥後李曾伯守岳重修岳陽樓記有曰洞庭天下之勝岳陽樓又擅洞庭之勝慶曆之記盡矣又范處義節帥荆湖修文正祠堂

史南曰臣攷宋史及姑蘇志已撰文正公之子純仁純佑于登績紀美然而文正百代殊絕人也其所撰岳陽樓記與洞庭君山爭雄長豈直

為一方一湖勝哉贊曰洞庭九江君山獨幽子京出牧希文好仇筆驚風雨字走龍虬江湖廊

廟後樂先憂

胡銓

胡銓字邦衡廬陵人建炎二年進士五年除樞密院編修官八年秦檜主和銓抗疏論之檜以銓狂悖特詔除名編管昭州改簽書威武軍判官諫官羅汝楫劾銓飾非橫議詔除名編管新州二十六年檜死銓量移衡州銓之初上書也宜興進士吳師古錄木傳之金人募其書千金其謫廣州也朝士

陳剛中以啓事為賀其謫新州也同郡王廷珪以詩贈行皆為人所訐師古流袁州廷珪流辰州剛中謫知虔州安遠縣遂死焉自孝宗即位召歸經筵加資政殿學士卒謚忠簡初銓貶衡有上饒方疇者字耕道與銓同榜進士謫守武岡移零陵建亦樂堂銓為之銘曰轂丹族赤纆綫不辱陋巷易安鬼瞰高屋拙補食前患靡覆餗媚斧伐性妙在獨宿孰哲茲理至樂常足我思古人自反而縮

史南曰天下有道則公論在廟堂海內多沴則公論在草茅信斯言哉夫以宋事觀之比隣契

丹西阻元昊立國汴都已非巖險開寶興國諸臣偷安至王安石變法元老耆儒救過不暇而姦邪儉佞講張為幻遂繼以呂惠卿蔡京章惇以啓金人之寇時康王渡江宗社其綴旒矣建炎紹興乘輿播遷乃有如秦檜者勅辱忠貞力主和議正人端士斥逐荒野而瑣庸嗜香翁訛為朋又繼以韓侂胄史彌遠賈似道以啓元人之害時幼主航海帝胄其胥溺矣於乎權臣之禍人國固若是烈也邦衡獨能力倡正議請誅袁黨鷹隼高翔虎豹長嘯噫非斯人其孰與歸

贊曰鷲鳥累日不如一鷄厥氣英英厥志卓卓
氣壯山河志凌寥漠為天下風九京可作

楚紀卷之五十三

楚紀卷之五十四

皇明賜進士經筵講官修國史奉直大夫前翰林院侍講學士臣廖道南謹撰

穆風內紀後篇

宋濂 方孝孺

宋濂字景濂金華人吳元年徵劉基章溢葉琛偕濂
來見于金陵

皇祖命為翰林學士承旨備顧問為

皇太子師授業大本堂晚年謫夔州先是與蒲圻魏
觀游撰碧崖亭辭叙曰濂與太常卿魏觀先生游
甚久知其為孝敬人也先生嘗謂濂曰予家鄂之

蒲圻有山曰蒲芒鳥巉然而起如雲旃翠蕤蕩摩
空濛間對峙雙石檻直上如筍中敞碧千尋嘉葩
靈草雜被之紛紅駭綠儼圖畫中先人愛玩不忘
日支筇步其下或濯纓澗底咏詩坐磐石上或望
雲出沒崖谷悠然忘返遂以碧崖自號時移事遷
層崖絕壁雖蒼然不改於舊而先人則追逐羣僊
於風馬雲輿中弗能見之每過其下不覺潛然出
涕故於宦游所至揭碧崖之名於楯間所以志之
思夫親也雖然名之固寓也而言之則尤寓也曷
若親履其地而求先人之遺跡乎當今

聖人在上方以孝治天下他日築亭山麓仍以碧崖
名之當風日清美與二三子游其間指而言曰彼
清泉瀏瀏而斜出者此先人濯纓之處也磐石纍
纍而可坐者此咏詩之地也崖谷沉沉靈氣之宣
通者此望雲出沒之所也一俯一仰精神參會非
唯慰其遐思抑將藉是以勵夫所學期克肖乎先
人予雖耄矣此心敢忘子幸為辭濂曰傳有之舜
食則見堯於羹坐則見堯於牆古之上聖若斯况
下者乎人子之於親遇事觸物無有不可感勵者
况親所游歷者乎斯亭之建當與甄氏思亭並稱

其視崇臺芳榭以聘游觀者何如也先生字杞山
觀其名也學富德行脩踐揚中外其善政蓋章章
云辭曰崖之雲兮英英其升崖之木兮欣欣其榮
悵仙人兮何之颯風薄而上征豈降精而委祉兮
發為休徵三秀之茁兮膏露之凝渺長思於無窮
兮視一息於千齡金可銷而石可泐兮又焉能爽
吾之精誠

方孝孺字希古寧海人年十五侍父克勤游濟汶窺
鄒魯登泰嶽翛然有凌雲之氣乃涉淮泗走京師
謁宋學士濂學為文往復游龍門卒業馬洪武壬
戌吳沉揭摠壽薦于朝

皇祖問曰孝孺孰與汝對曰十陪于臣乃誠靈芝甘
露論文藻峻發根究理性

上大喜謂懿文太子曰此莊士也畱以輔汝汝當識
之

皇太孫素重其才即位召為侍講輔政先是孝孺為
蜀府紀善舟經黃鶴樓叙詩卷云奇偉絕特之觀
固無與於人事然於其廢興可以知時之治亂焉
夫黃鶴樓以壯麗稱江湘間當天天下盛時舟車旌
蓋之來遊考鍾鼓肆管絃燕會于其上者踵相接

也元末諸雄之相持武昌莽為盜區屠傷殺戮至
于鷄犬求尺木寸垣於頽城敗壘間而不可得天
下之亂極矣大統既一海內建親王鎮楚以其地
為國都旋頭屬車往來乎其土者四時不絕盛世
之美殞將稍稍復覩余恨不獲見之茲焉觀其狀
甚悉雲濤烟樹咫尺千里夏口漢陽蒼蒼如目睫
展卷而卧閱之恍然如乘扁舟出入洞庭彭蠡之
上而與李白崔影輩同遊也今四方日就治平而
江湘尤予所願游者他日苟或再登為之賦詠以
追蹤於古之作者或者其始諸此乎乃撰赤壁歌
云東夏口西武昌赤壁峭絕當中央奸雄將軍氣
盖世敗卒零落慚周郎得鱸魚沽美酒就黃州謁
蘇子謫向江湖動星斗噫歎歎曹公氣勢蘇子文
章人物銷鑠塵跡荒涼惟有江水千古萬古共流
長

史南曰臣聞之易曰觀乎天文以察時變觀乎
人文以化成天下是故三垣列宿成象于天確
然示人易矣六經五典成教于國粲然示人簡
矣

皇祖開天御宇用夏變夷濯腥羶而馨香之剡澆漓

而博裕之革鞮象而句讀之刮雜揉而統會之
是故潛溪以正學肇儒宗遜志以直氣翊文運
渾厚不譁和平可誦治世之音安以定颯颯乎
其大風也哉彭韶贊濂曰春日載陽列宿繁張
江流湯湯是為先生德容之粹文名之高學問
之長變夷輔夏正我綱常功在萬世其曷敢恐
謝鐔贊孝孺曰我台之學考亭是師迨於愚庵
實聞而知愚庵之子是曰正學益擴而宏上泝
伊洛如麟在藪如星在晨旁觀一世絕類離倫
潛溪之門盡天下士驚叱起立謂莫敢比心實
希聖自視歔然銘盤書紳雜誠惓惓家人有箴
宗儀有紀謂道之行莫先於此學以氣充磅礴
四行孰顧孰忌禍福死生歷宋迄元士氣益下
有復古初不在作者

解縉 楊基

解縉字大紳吉水人縉幼稟神識五歲誦書七步賦
詩十歲日記數千言洪武戊辰進士與弟金華同
選為庶吉士

皇祖親加校閱特被寵眷未幾上大庖西奏議言甚
剴切命為監察御史代救李善長寃疏上

上召縉父諭曰才之生甚難而大器者晚成其以而
子歸益進其學又謂縉曰朕於爾義則君臣恩猶
父子其益盡心于古人後十年來用之未晚也
上升遐縉入哭臨權臣構之謫河州為吏未幾為待
詔

成祖靖難雅聞其名召為翰林學士開文淵閣簡用
楊士奇等七人備顧問

皇太子立縉預議漢庶人高煦等復構之李至剛復
構之謫廣西叅議又改交趾後死于詔獄其南行
詩云結髮事

明主摛文翔鳳池載筆侍幃幄衣繡當前輝煌煌沐
恩眷賜歸奉庭闈十年遭命否河壠孤栖還東還未
展翮一麾復南馳時來過鄉郡訪舊同翺嬉留連
接權宴不忍暫相違稚子知我去寤寐率裳衣小
妾中夜泣為言歸何時丈夫四方志離別何足悲
今逢

天子聖底定如京圻多才寔濟濟中外羅星棊治效
日熙皞斯民信無為自當安寒拙守此年命奇
聖恩許謝事樂矣不復疑壺觴集群彥遲我從南歸
又過茶陵詩云清江一曲弄晴輝樹色山光綠染

衣正好垂綸尋酒伴休官便買釣船歸過耒陽詩
云蔡倫池上霧如紙杜老祠前秋日黃為問靴州
江上水流船三日到衡陽過衡陽云欲上衡山看
洞庭往來無暇不勝情秋霄跨鶴搏雲下歸路猶
堪借月明

楊基字孟載吳人洪武三年起為滎陽令辟居江西
行省六年奉使湖廣還為兵部員外郎山西按察
使與高啟張羽徐賁為吳中四傑其過長沙吊賈
太傅詩云才高衆所妬年少衆所輕柰何文帝賢
而乃摘賈生災劉握乾運寬大易暴羸涵濡三十
年孰不為政成生年胡不祥慟哭淚滿纓外防
狄奸內謹七國爭禮樂與風化無一不可行帝心
既未遑逆論乃拂膺長沙卑濕地落日鵬鳥鳴臨
湘歌短篇哀痛吊屈平雖承宣室問前席何足榮
我來欲再拜祠宇久已傾荒苔剝斷碣滿目皆枳
荆汨汨祠下水猶聞太息歎又望岳麓云我為長
沙客不醉長沙酒為愛岳麓山繫舟城邊柳峰巒
一何秀膏沐春雨後蛾綠淨洗粧方知朱鉛醜所
嗟山中寺頽圯想已久嶙峋北海碑千載獨不朽
信為神靈惜長使山鬼守褰衣欲訪古日落辰在

西荒烟鳥雀喧密竹虎兕吼老眼念後期未知重
來否又望南岳云我從匡廬來但覺諸山低嗟峨
望衡岳雲霄與之齊下有赤蛇蟄上有朱雀棲仰
瞻祝融拔俯揖紫蓋迷五嶺皆培塿三江為涔蹄
巍然南服尊嵩霍相提携封秩崇君稱諸神咸朝
濟丹書篆寶冊萬古封金泥百王重祀典赤纁藉
玉圭自非精靈通牲帛勞焚齋余方向遠道無由
陟層梯蒼蒼烟霞中喔喔開天鷄緬思昌黎伯恭
默開雲霓靈貺自昭格誠敬良可稽斯人久云沒
感念徒含悽又題相竹云朝行相竹下暮宿相竹

中雲情與雨態萬變俄不同密密深翳日疎疎

含風新梢露裊裊老節烟濛濛紛如千靈妃從以
萬青童幡幢列縹緲環珮搖丁東來從蔚藍天步
入東華宮悵望不可即翩然若驚鴻大矯喜而笑
低回俯乃躬質堅本外直性潔緣中空籟爾中弦
矢揉之可形弓冰雪誓不易肯與時滂隆今朝揭
春晴更覺翠色濃戢戢琅玕叢忽見桃花紅直疑
路不遠便與桃源通我欲捐輕舟褰衣入崆峒春
禽迎我啼音響諧絲桐終當聽山雨自號蒼筤翁
史南曰縉負奇氣抱雋才意興所到肆意成章

水搏蛟蚪陸剝犀象淵乎其不窮浩乎其有餘
其自視何如者

高皇網羅英賢智屈群策當時翊運元臣親如善長
貴如廣洋惟庸近侍如安如濂如觀如素雷霆
所擊罔不震懼縉以一少年上庖西萬言疏批
鱗逆心靡所忌諱而

聖度優容令其進學才難之嘆猶可想見規模真完
遠矣召旋河隴荐歷清華密贊建儲有故老舊
臣所不及知而獨幹運

廟謨措神器下磐石視古英哲何以加者然諫沮交

阻力抗權倖卒罹于讒莫之敢自悲夫基也自
負國華崛起吳上與高啓張羽徐賁號為四傑
然未都顯仕遽墮讒網豈造物忌名故耶賈曰
董子三策賈生萬言誓日遭迴颶風孤騫縉也
奇才國士鮮儷遭際

真龍逆鱗弗諱河朔既窳日南載遷魂飛湯火殄瘁
疇憐文貞銘詞勒于貞石潛光益彰照耀方策
基也吳彥陸雲之儔望嶽賦詩浮湘悲秋我思
若人猿鶴與游附之縉傳英風名流

王越 王守仁

王越字世昌大名濬人景泰辛未進士授監察御史
 歷遷都御史巡撫大同值北虜滿都魯孛羅往甘
 肅西海越率兵蒐套大有斬獲陟兵部尚書封威
 寧伯言者論其邀功開隙謫居安陸復起左都御
 史總制三邊加太子太傅其題神龜洞詩云玄衣
 督郵五總仙走向漢江江上眠夜半神奇化頑鈍
 高山仰止三千年山頭石開口如甕元氣淋漓香
 霧重天巧難容谷鑿痕玄關深鎖虛靈洞紫苔點
 破翠洞幽潏潏魚吹春水流水聲流出到平地塵
 土滿溪煙雨收六眼笑春萬火驚蛟藏錦飛江
 浪四嶽松檜開清風搖曳綠毛長幾丈七十二鑽
 骨已枯青天倒掛碧玉壺盡師塗抹果何物是乃
 古今真畫圖嗚呼此山造化若肯賣買取洞中閑
 世界狂歌醉舞問傍人不知我與白雲誰自在
 王守仁字伯安餘姚人弘治己未進士累官副都御
 整飭南贛汀漳軍務值宸濠反與知府伍文定協
 謀募兵勤王共討平之陞南京兵部尚書加太子
 太保封新建伯先是正德丙寅守仁以罪謫貴陽
 汎沅湘吊屈平其辭曰山黯慘兮江夜波風颼颼
 兮木辭柯汎中流兮馬泊湛椒醕兮吊湘纍雲冥

易風句已後

冥兮月星蔽晦冰峻嶒兮霰又下纍之宮兮安在
悵無見兮愁予高岸兮歎崎紛糾錯兮樛枝下深
淵兮不測穴瀕洞兮蛟螭山岑兮無極空谷谿砢
兮迥寥寂猿啾啾兮吟雨熊羆嗥兮虎交跡念纍
之窮兮焉托處四山無人兮駭孤鼠魑魅游兮群
跳嘯暇出入兮為纍姦宄嫉纍正直兮反詆為殃
昵比上官兮子蘭為臧幽叢簿兮疇侶懷故都兮
增傷望九疑兮參差就重華兮陳辭沮積雪兮澗
道絕洞庭渺邈兮天路迷要彭咸兮江潭召申屠
兮使然絨絨波兮泊蘭渚暎故都兮獨延佇君不還兮鄧為墟

心壹鬱兮欲誰語郢為墟兮函嶠亦焚讒鬼逋戮
兮快不酬冤歷千載兮耿忠悞君可復兮排帝閭
望遺跡兮渭陽箕罹囚兮其佯以狂艱貞兮晦明
懷若人兮將予退藏宗國淪兮摧腑肝忠憤激兮
中道難勉低回兮不忍溘自沉兮心所安雄之諛
兮讒喙衆狂穉兮謂纍揭已為魅為魅兮為讒媵
妾纍視若鼠兮佞頰有泚纍忽舉兮雲中龍旂掩
靄兮颼風橫四海兮倏忽駟玉虬兮上衝降望兮
大壑山川蕭條兮濟廖廓逝遠去兮無窮懷故都

兮蜷局亂曰日西夕兮沅湘流楚山嗟峨兮無冬
秋纍不見兮涕泗世愈隘兮孰知我憂

史南曰臣嘗采諸輿論徵諸

國史有慨于二王之事焉夫越以奇謀秘策伸威北
虜天山鳴鏑河套揚戈錫券咸寧守仁以懋學
高才靖變南藩盟府策勲講壇設教分符新建
非古所謂豪傑之士乎然而守仁門弟子遍海
內雖師死而不忍負之越死未寒已不能庇厥
宗焉此又設奇秉正學術之不同而天道之報

施亦異焉爾贊曰天賦奇才惟冠萬夫人歸者
碩名重兩都勳昭麟閣位峻龍圖二公同傳

世允孚

沈暉 柳寶

沈暉字時暘宜興人天順庚辰進士授南京戶部主
事轉郎中擢陝西參議福建參政陟都御史撫治
鄖陽進工部侍郎初代祀南嶽借李承基游暉撰詩云
皇帝御宇十載春萬邦樂業歌堯仁四方比者秦水
旱宰相馳國達紫宸

聖衷憂懼不遑暇誕修德政期更新已令中外上封
事復告

郊廟禱百神恭惟五岳在天地間峙海內鎮台衡大
衡去國獨萬里綿亘楚粵連甌閩乾文上配朱鳥
宿坤軸下盤炎海濛噴雲濺霧雨九土恭贊造化
協鴻鈞邦家自昔謹常祀矧今異典從天申小臣
祗命罔敢怠即日就道航江津北風吹帆疾如馬
越數千里僅一旬大都小徇畢來會車馬雜還聞
城闈致齋三日始將事星斗燦爛羅蒼旻升壇跪
拜獻三帛牲肥黍香玄酒醇群上登歌韶樂奏肅
穆上下和神人精誠交孚若有假九霄恍惚集衆
真

六龍御輦五雲繞前導朱鳳後赤麟來無形聲去無
迹但見香霧颺冠紳禮成闔廟下山去松栢夾道
清無塵初陽照地人影亂林鳥翔舞野鹿馴田翁
村老迎道左龐眉白髮紫領巾共言累歲遭亢旱
五穀不熟民饑貧幸蒙

天子念黎庶祈禱為我遣大臣
皇心纔感神輒應春雷震發雨澤勻高田下隰遍禾
黍風吹碧浪光粼粼秋成百里端可望登場奚翅
三百困公家賦稅早輸畢殺羊置酒會里鄰人心
和樂天道順灾害不作禎祥臻邦基永保萬年固

民風再近三代淳臣暉作頌勒山石神功

聖德昭無垠又在房陵撰天馬崖歌曰房星墮地化為石秀削蒼崖三萬尺長風吹散楚天雲突兀秋空聳晴壁神駿何年此地游至今隱字石間留僊駢一去無消息山下蒼江空自流吾聞用地須良馬古來不惜千金價吁嗟騏驥世不常愁見駑駘滿中野長望真龍升紫虛風雷白晝騰天衢出隨天將平胡虜入為

君王駕輅車

邵寶字國賢無錫人登進士第出知許州徵入為戶

部郎中擢江西提學副使轉湖廣布政南京禮部尚書時與西涯李文正公守溪王文恪公游多所撰述其在黃州訪蘇文忠公遺蹟步定惠海棠韻詩云草堂三間倚林木如魯靈光歸然獨當時坡老賦海棠遂使荒丘頓超俗乾坤俯仰五百年多少高陵變深谷愛人及物自古然甘棠在野鳥在屋誰將蔬圃一治之彼哉鄙夫徒食肉今之太守關西豪友盡今人猶未足沅逢別駕是同鄉前日臺端望尤淑登臨吊古每賦詩萬丈虹光吐便復清標既逼雪堂雪雅韻還宜竹樓竹我持憲節東

南行偶陟黃岡一遊目高山仰止同此懷如覩
我在西蜀雄篇可讀不可和白雪渺渺天邊
一
株培植兩侯心酌酒酌公歌我曲願言折竹作新
籬等閒莫遣羝羊觸

史南曰臣觀震澤集乃見王文恪公銘沈時暘
有云抑抑沈侯潤澤而栗自為郎中所至則發
四臨大藩御史中丞南少司空名位具登古亦
有言清而容物吾豈不容恥是咕聶及和邵國
賢詩云杖藜晚上清風閣北望雲山渺丘壑懷
公不見誦山詩清廟朱絃為誰作晨星落落今

數公平生出處將無同我生與世早多忤乞乞
歸卧雲山中與公周旋亦云久不飲每酣公瑾
酒子牟魏闕本江湖公也那能忘黔首嗟乎觀
其銘可以知時暘之清而不弘矣觀其詩可以
知國賢之裕而有容矣守溪豈欺我哉贊曰沈
公天挺英才之英祀嶽有詠聲振瑯琳邵公國
老士林之珍和蘇有詞律協韶韻震澤之銘西
涯之評載筆如椽宛若登瀛

劉炳 蕭子楫 廖瑾

劉炳字彥昂鄱陽人繇文學入翰林為應奉官嘗撰

荆門賦其詞曰君山秋兮蒼蒼洞庭寒兮欲霜
流碧兮潦盡木殞黃兮菊芳白鴈啣蘆兮七澤凍
玄猿號風兮三峽長客有佩明月之琳琅翳鳳凰
而翱翔纓茜飄兮絳彩月蓮吐兮雪芒思攬轡於
昭丘爰弭節於荆揚顧漢水之為池睠方城之為
隍據軫翼之躔次古熊繹之封疆沅沱既導朝宗
于王厥土惟泥黍稷穰穰馳馬被野牛羊彌岡纒
組燦爛金玉鏗鏘菁茅菌輅栝栝豫樟鴻鴈鳧鷖
鵠鶴鴝鶻砂丹石翠椒紅橘黃玄獐大龜赤鯉音
魴羽毛翠革物產之良富國強兵之所利宜并

吞割據之相攘嗟乎惟昔漢綱解紐炎靈中微旄
頭夜蝕天狼晝垂赤刀鳴於武庫白魚雨於京畿
洪流板蕩黨議橫馳奸臣竊命太阿倒持曹瞞挾
翠華以遷許董卓積黃金而築郿六鰲揚塵於紫
渤九龍失水於瑤池志士懷攬轡澄清之慨勤王
勳枕戈興復之思通人俯仰於形勝未嘗不痛恨
於桓靈之陵夷也東望夏口蔚乎武昌鳩鵲之觀
抗神宮於雙闕黃鶴之樓凌雉堞於中央鸚鵡芳
洲帶草色漢陽野樹迷烟光懷其赤壁烏林淅瀝
憶樓船之如林想旌旗之蔽日殷動地之征鼙列

和風... 卷五
連雲之戰戟妖氛引於宛洛殺氣纏於郡邑火星
朝騰烟砲夜擊檣連烽燧岸走沙石龍虎決於雌
雄成敗等於呼吸謀興輔王業於萬全何土崩瓦
解於瞬息孫策周瑜之成美曹操張遼之失計事
竟敗於驕矜身幸免於倉卒致當時之扼腕重來
者之歎息故壘蕭條斷壕周遭江屯崩雲湍呼怒
濤楊柳頻春於別淑蘆花慘雪於殘潮寄登眺於
草木付歌嘯於漁樵夢明月於白鶴弄春風於紫
簫往矣醜酒臨江之槩傷其橫槩賦詩之豪所謂
東風不與周郎便銅雀春深鎖二喬者乎南望則

岳陽之區雲夢之墟包羅渾沔煦浮太虛衡嶽
岫朱陵氤氳娥皇遺廟粉鈿消香於春色蒼梧故
隧深澄沉彩於秋塵玉鸞剝於寶鑑金鴈浮於海
銀長沙之浦瀟湘之垠鳴夜雨於斑竹捲西風於
白蘋困遷謫之賈誼悵行吟之靈均忠貞之諫弗
任泣涕之書徒陳天衢騁於駑駘草澤悶於麒麟
楚人致懷沙之悵漢文空宣室之勤所謂可憐辛
夜虛前席不問蒼生問鬼神者乎西望則白帝挿
漢鳥道際雲迺灑瀨霜沸峩嶺黛勾龍湫虎牙尾
門吼白鹽赤甲虞淵昏天府沃壤于以定霸而制

國鑄山煮海于以濟世而安民啓中山之帝冒伸
大義而奮身結關張之英姿同魚水於君臣起躬
咍之高卧枉三顧之慙勤義旗渡於灑水耕者雜
於渭濱運木牛於流馬森八陣於鼎分誓鞠躬而
盡瘁痛嘔血之酸辛墮大星於前營傷漢祚之遭
迤所謂出師未捷身先死長使英雄泪滿襟者乎
北望則襄陽縈迴峴首崔嵬汝穎廣衍唐鄧宏開
沙湮檀溪之浦棘覆龍山之臺孟嘉芳躅帽落斜
陽於杞菊龐公高隱徑迷斷靄之蒿萊高陽之酒
徒零落習池之歌舞誰來更無金鞭換小妾寧復

銅鞮歌落梅紅剝鷓鴣杓翠消鸚鵡杯淚亦不能
為之墮心亦不能為之哀所謂晉朝羊公一片石
龜龍剝落生莓苔者乎吁嗟兮風景不殊山河如
昔慨戰馬之何在消風雲於倏忽何三國之英傑
逞干戈於智力措蒼生於魚肉不能一日安於枉
席爭腐鼠於飢鳶致羝藩而臍噬徒區區於井蛙
莫能混南北而為一豈天運有常抑非人力之所
能致者乎偉哉我

皇龍奔虎驤雄劔一呼囊括八荒

蕭子楫泰和人蒲圻教諭撰蕭堆賦其辭曰景泰二

載重光協洽夷則應律金氣曩顧啟觀瀾之孤亭
 留睨乎高山流水維東有峰狀如覆釜下有蕭堆
 勢若杯土歸然如伏岬然若起嶻嶭若斷崔嵬其
 峙崇雖不踰數仞厝亦不盈數里壯蒲圻之偉觀
 獻芹滌之佳致四山噴吼若驪龍之戲珠一水
 潏决下匯赤馬之江泥固非君山之在洞庭鞋山
 之在彭蠡亦非蓬瀛之泛滄溟金焦之砥楊子要
 諸名勝曷足以擬厥植斯動厥溪斯止惟土地兮
 潤澤肆卉木兮輝光彼芙蓉兮孰匪歲莖有臺棗
 兮可儷芬芳繁松筠兮灌栲粵桂菊兮幽香若鄧

林兮鬱鬱駢早麓兮蒼蒼實日兮鳳若和鳴警露
 兮鶴引圓吭食萍兮鳴鹿呦呦在谷兮白駒彭彭
 諸生乃摳衣而趨拱手而告曰先生傳經庠序于
 茲有年效知者樂順性之天曷不登疊秀眺豐財
 躋白石躡雲臺棲鳳隱陟龍蟠瞻蒲首倚馬鞍迺
 區區蕭堆之是觀乎噫先生之所樂者不在乎山
 而以其名為蒲耶抑亦必有獨得於心而若是其
 貴豈耶蓋先生徒知其可樂而不知其所以可樂
 之妙也予既駭然而聽之復喟然而應之曰其然
 豈其然乎諸生對曰茲山雖小鍾秀孕傑巨浸一

激大魁斯出前乎漢唐群英濟濟後乎宋元碩人
侯侯調和鼎鼐則有趙葵甫列官諫議則有費師
古與夫廖竹林之祖孫世家何蕤溪之父子接武
迨我

皇明混一區宇雲興從龍風烈從虎歷清卿而終祭
酒者魏公杞山侍儲極而任藩臬者王公時舉或
登第兮遙羽煙霄或聯科兮施澤霖雨司風紀兮
激濁揚清寄民社兮庇民尊

主職武備兮閑黃石之略教文學兮彰文公之美是
山靈結於衡湘治化同乎鄒魯曾如斯而已乎先生

曰噫嘻子之所言可謂允臧爾矣然不知希聖而
入神則甘自棄而徒人羨矣天爵苟脩人爵斯見
在諸生之自勵庶所生之不忝諸生唯唯而退皆
曰先生之言其善矣乎先生無言而退惟見夫蕭
堆之一山巋然為蒲川之砥柱

廖瑾泰和人通城教諭撰翠屏山賦其辭曰翠屏有
山兮根何自而盤旋肇玄黃之儀分兮引岷嶓之
後先歷九疑而跨大別兮迄江漢之南壖環東北
而起伏兮繇脉絡之蜿蜒突然孤撐兮聳通羊之
前圓峰不峻兮珠光爛懸卧石不突兮玉花靜妍

依稀乎祝融之天柱彷彿乎太華之金蓮徘徊顧
睇孰與比肩壯輿圖兮地偏締赤壁兮低連鬱萬
松兮玄鶴翩躑麗千葩兮黃鳥緜蠻起飛雲兮嘯
猿擺藤蘿兮秋煙樵斤踏雪兮攀緣紫芝燁燁兮
香流泉彤霞絢碧兮瓊崖水田物寶既萃兮鍾英
與賢乃地靈以鎮安兮求禹跡於當年台時方依
岩石而遠眺矚林麓而孤騫有叟皤然曳杖仰面
睇天乃蹠而問曰先生之道於茲也歲亦兩載挹
雲攬霞厥亦自愛久探幽情樂亦斯在惟知是山
之竒而不知昔人之可慨也予逼而問之曰叟知
之曷不為予言其槩耶叟曰粵自往古莫知所從
厥初無名葱菁龍叢世代既遞遂如飄風百不存
十蝟藏莫容茫茫百里其誰是宗鞠為茂草秋雲
茫茫入我

皇明生意乃復始奠我居構我茆屋垂四十年民賴
以足我時一暇散髮捫腹登于嶢岩瞻被或或或
啓岩扉緣茲脩竹幸今嘉客得樂所生既無叫囂
復忘縱橫日入則息日出則耕強亦莫奪富亦莫
爭抱孫與子老我弟兄今日太平其能有此情也
先生典教于斯宜怡爾神兮宜順爾志夜窓有燈

訓爾諸子衣不必華披襟是美味不必兼適口則
止我聞于人好樂不同笙鏞雖殊其音則通
聖明在上爾祿當崇善保福祉令名無窮予因問其
姓名俛首而去咲而拂衣竟莫知其處

史南曰嘗觀宋景濂學士叙彥昂集云氣韻沉
鬱若謝康樂神情脫灑若岑嘉州風乎仙游英
乎霞舉若李供奉由其考友梧與虞文靖揭文
安吳月灣相友善以故其文益奇其體益奧以
今觀之彥昂荆門之賦亦唐體也其於班孟堅
之二京左太冲之三都未有聞焉若蕭子楫康

瑾職典文庠情馳藝圃體雖近俳意多法古是
之取爾贊曰靈均跡迥作者何人宋玉悲秋長
卿凌雲兩晉藻爛六朝葩芬唐賦摘詞宋賦泥
音元人弗古俚亦可徵

國初開宇萬籟蘇聲登高作賦罕見其倫彥昂揮毫
景濂席珍蕭堆蒲水翠屏通岑即茲神理擬必
以倫

李夢陽 何景明

李夢陽字獻吉陝西人弘治癸丑進士累官江西督
學副使初欲寓居襄陽作漢濱賦望漢陽作弔鸚

鵠洲賦文多不載惟泊雲夢作雲夢賦其辭曰
余紛以好覽兮懷長風而浪濤夏匯液之浩浩兮
阻雲夢之逆颺哀南紀之攸墊兮荆衡之衆山貫
江漢以為絡兮來朝宗而播源翼潛沱之翩翩兮
掖景陵之莪原吞沔鄂之曾隰兮洗逶迤而淡漣
坻坳坳兮掩翳橫余前兮蕪葭紛而蔽天月重陰
以繁雨兮駭厥鳴為之先鳴萬大別以悠汧兮遘
少陰妬而用情次大澤之巖墮兮睇風雲之上征
惟彼斗酌而靡均兮縱柔金以噓吸孤心昏以徒
爛兮越西流之靡及覽萬情之翻覆兮爰昔坎而
向離指朝景以辨位兮定星辰而訊期極明晦之
變態兮蠶洋滂之淫漪揚舲以凝睇兮數周圍之
峻岑勤伯禹之工乂兮坤維奠而至今情瀆滉以
無依兮聊唁昔而周章慨五湖之見幾兮詠孺音
於滄浪胡洞庭之險整兮三苗區而蕪滅舳舻蔽
江以來下兮孰攘攘而非衣食往者既不可追兮
吾寧俟時而矯心掇陽潛之文具兮采芳芷於漢
潯龍擾余以負絃兮珠夜游而光吐憑烈性之難
抑兮淚浪浪隕而思古誦曰昔有郊郢厥惟楚都
實邊雲夢百雉其郭何材弗殖寶玉明錯魚鱉鱗

麕於物訐訐麋麋甫甫齒革毛角有茜有董各以
類積礧礧岳岳服食之屬芣芣絲葛甘鹽苦酢靈
餌珍藥觶弩勁斨犀甲狼毒王府充溢宮室棺擲
商旅沓至貿遷繹繹漁牧詣足鳴琴巷号國以富
強鞭撻晉秦挾鄭狩獵出入二藪旌旗千里戈船
璘玢金銀璨璀倏呻忽閃獸柴鳥墜追者稱善後
王何道游關靡返懷沙奮辭邦墟憐惋

何景明字仲默信陽人正德戊辰進士授中書舍人
奉使經湖廣其寓武陵詩云武陵一何長遼遠不
可測高林多悲風慘澹日無色黃熊啼我前白狐
跳我側蛟螭蟠深淵不見奔雲黑沙蒸水亦毒我
僕饑且踣辭家忽踰秋適此萬里國土風日以殊
川域邈無極伏波有遺響吟餘轉悽測河因托橫
吹一寫千載憶又云承明播宸渙西適蠻夷州艱
哉武陵山古道何悠悠狹谷不容憶水中無行舟
仰探虎豹窟俯瞰蛟龍湫徘徊遲吾馬中心懷慄
憂脩程尚延豆我行何時休又云羣山何逶迤環
峙如百城其上干青霄其下浮雲征出沒千萬態
倏忽殊陰晴撫茲豁心目頗慰羈旅情又云驅馬
山上行山高何巍巍修阪接飛翼百步仍九迴倪

卷五十四
三

視烟靄中衆山鬱何壘茫然望四海萬物亦已衰
昔我別京國朱華猶未希歲節忽復易何時當旋
歸又云大壑百餘尺流水浩湯湯我行路中斷欲
渡無橋梁誰為理舟楫石亂不可航改轍上危棧
登茲千仞岡臨深古有戒側足以徬徨又云山深
多樹木百里人民稀時有四五家茅茨隔山陂沙
田不可耕何以禦歲饑門前數畝園祇收蓬與藜
平明出汲澗薄暮始得炊童稚那敢出但畏逢虎
羸草黃納晚禾桑綠催官絲嗟爾遠方人辛苦誰
具知又云山勢行轉復連峰相貫輸窈然林莽中
乃復得坦途青壁結烟靄縹緲凌虛無層阿秀嘉
禾下覆清水渠夙志好幽僻覽茲耳目娛公車雖
少延顧盼忽已踰安得鼓清琴日坐山之隅又云
谷轉岡漸平策駕循陂陁遙望辰陽城枕山帶長
河飛甍苦鱗次居人一何多按節駐江館登眺崇
山阿南衢聞夜絃北里揚朝歌誰云接夷域文物
殊中華過蒲圻又云向晚蒲圻道遙聞鷄犬喧斜
光入深巷疎雨過閒門縣市渾依水人煙只類村
蕭條燈火夕沽酒共誰論

史南曰臣恭攷

國初以來洪武間以劉誠意為鼻祖宋潛溪繼之時
則有若王忠文之渾沉方遜志之醇雅皆學韓
而變者也永樂以解春兩為正宗楊文貞繼之
時則有若金文靖之冲蔚胡文穆之浩博皆學
歐而變者也弘熙宣德

兩朝世底熙洽文亦和平正統景泰天順

三朝事多變更文隨升降成化中以楊文懿為接武
羅一峰繼之弘治以李文正為主盟程篁墩繼
之或變韓而入于柳或變歐而入于蘇至正德
時几幾變矣李獻吉何仲默則以詞學鳴王陽

明湛甘泉則以理學鳴語文則宗左氏語詩則
宗杜氏語理則又宗陸氏紛乎何多岐也我

皇上法古皇王直追

神聖嘗諭詞臣有云堯舜二典何簡與唐宋諸史何
浩繁其集議以聞大哉至矣易曰觀乎人文以
化成天下道其在茲乎若夫何李二才人之作
足以羽翼詞垣翱翔藝苑黃省曾叙空同集曰
矩之音氣何密弗研獲其神精何奧弗範王廷
相叙大復集曰斯文出於元精應與元氣並存
其知言哉贊曰神龍見田文明利見隱豹出谷

文蔚自變空同天挺玉光璀璨大復人豪藻章
葱蒨至今牛斗昭回雲漢

韓陽

韓陽會稽人進士授監察御史出補湖廣提學僉事
撰山川人物賦其辭曰海內名藩江南列府按禹
貢以為荆書春秋而曰楚疆連百粵之區界接三
吳之土拱京師以通貢獻之衢隣黔蜀而居要衝
之所編氓之戶口衆多商旅之舟車旁午人材盛
於我

朝物產饒於前古試結陳其一二曾不揣乎愚魯若

言夫州郡之名稱考長沙間于衡岳與國
昌蘄黃來漢沔之水德安邁隨郢之方澧州荊
夫常德均州今轄平襄陽荆南通辰沅之域寶慶
接道永之疆桂陽隣于郴壤靖州抵於武岡歸州
處夷陵之上荆門依南郡之傍沿革不一建置靡
常遺基故跡未暇悉詳以言夫山形兮前嶺後岫
之無窮壘嶂層巒之無盡八面兮崔嵬五嶺兮高
峻幕阜兮千尋風門兮萬仞三十六峒兮幽且深
七十二峯兮直聳以竝獨尊乎南嶽之衡山兮乃一
方秀氣之鍾孕邀泰岱以齊封兮拉會稽而為鎮

以言夫物產兮則有稻梁秔秫之梁黍稷粟麻之
 味麥有蕎稊小大之殊豆有黃紅綠黑之異公需
 賴之而充民食資之以備其蔬則有瓜茄葱韭蒜
 薤芥薑蒜甜蘆菔芋宜食菠稜蒿苣兮可嘗又有
 絲綿之帛絺葛之布可以用於暑炎禦夫寒泣其
 木則有楠樟槐柳松栢椿桐桑榆梓漆楮柘檀棕
 楸杉檜棟檡楓冬青白楊玄機丹榕素檉可以制
 器可以作宮其竹則有篋笙絲管青白紫斑笛箭
 水蘄可比琅玕其果則有梨栗棗柿杏桃梅葡萄
 菊秋熟盧橘冬開茨菱蓮藕可博其藥則有

白木桔梗紫胡香薷烏藥山豆黃芩地榆細辛枳
 殼葶藶菜菔雲母之石仙靈之皮可以衛生而濟
 時其花則有牡丹芍藥薝蔔薔薇鹿葱罌粟瑞香
 蜀葵海棠石竹山茶木犀水仙月桂迎春醪醖可
 以含芬而識奇以言其禽之類兮則有鷹鷂鳩鴿
 山鵠竹鷄鸛鶉鵠鷓鴣子規黃頭秀眼白頭畫
 眉山鷄夜叫野雉朝飛可以觀物化之推移以言
 其獸之類兮則有牛羊犬豕麋鹿騾驢犍鹿猴兔
 虎豹熊羆豺獾獾兒狐狸猩猩能言佛佛解
 飛可以見物類之環塊以言夫水之多兮江湖河

水經

卷五十四

二十七

港溪澤潭塘初馬脉脉已而湯湯三湘來洞庭之
 右七澤出漢沔之陽衆溪分九江之派諸义遠二
 筵之邦或石多而為瀨或湍急以為瀧小河支港
 數不可量發之深兮則滔滔汨汨瀘之廣兮則浩
 浩茫茫吾惟重夫江之萬里兮何源遠而流長同
 大河以為瀆兮會淮濟而朝于東海之洋以言夫
 水之所生財之所殖其草類兮則有蘋蘩萍藻蒹
 葦菰蒲鳧鶩茨萍荻葭蒿荻蘆萋萋葦葦盈渚瀕洲
 其羽族兮則有天鵝野鴝鵒鸕鶿鸛鶴鴉鷓鴣鷓
 鷓鵠鴛鴦鴻雁鳧鷖宿食飛鳴鴛鴦鴛鴦相忘不驚

更有家鳧家雁沿池遶汀其鱗族兮則有鱖鯽鱣
 鱣鯢鱖鯢鯉鯉鯽鯽鯽鯽鯽鯽鯽鯽鯽鯽鯽鯽鯽
 均美可薦王公可羞祀禮江豚河豚不足言已其
 介族兮則有龜鼉鱉蚌蝦蟹蟹嗜龜焉為重卜筮
 所宜抑有蛟龍潜躍兮變化不時雖居鱗族兮人
 罕見之旱祈晴禱兮雲從雨隨客有晒子而言曰
 前此數者不過山川風景之形土地生物之名請
 以人才宦蹟為言庶乎文獻得有所證嘻子之言
 是也余請言其略焉屈靈均之忠憤兮形於騷辭
 黃文強之孝道兮出乎天性囊螢夜讀兮武子之

車泣筍冬生兮恭武之孟至若山甫有樊國之封
吉甫有房陵之韻又若仲謀之將佐多才孟德之
奸雄莫競故魯肅次烏林之兵周瑜司赤壁之柄
羊叔子墮淚之碑尚存杜元凱沉潭之石堪並陶
荊州運甓之勞庾開府登樓之興往事紛紜率爾
難罄姑以近代言之唐宋諸賢復古自振道學則
有程朱宗周子之淵源文章則有李杜偕韓公之
題詠嶽麓書泰和之名浯溪勒次山之姓宋郊聞
蟻渡之徵馮京著馬涼之應熙運初開訐謨斯定
茹少保忠誠之封允宜劉翰林文學之任尤稱德
行政事兮湘陰之夏公忠靖文章功業兮石首之
楊公文定任翰苑兮有蒲圻之魏公杞山贊官坊
兮有襄陽之任公享泰或由經術而登科或以殊
才而發解達士偉人金輝玉綴鴻勳碩猷星輝斗
貴惟保泰而履盈兮曰天監之是敬苟所任之非
才兮猶博詢而廣聽其命官也於藩憲兮則舉夫
廉公厚重之臣僚於郡縣兮則擇夫愷悌循良之
守令仁恩洽乎人心兮禮樂陶乎民性是故溪徑
帖帖以輸誠峒獠躡躡而內應山林之鳥獸無驚
江漢之風濤以靜家全事育之懽人樂昇平之慶

伊欲究其所由寔有賴於山川氣運之隆盛

蔡潮字巨源臨海人弘治乙丑進士授兵科給事中

出補湖廣提學僉事寓蒲肇修鳳山書院時道南

為諸生弱冠乃命作鳳山賦其辭曰霞山先生仰

謙山之嚙噬俯渙水之洗洋背良岫以枕陰面晉

旭以賓陽於是乎經野峴土詠日擇吉鳴工聚材

測景平臬伐巽木以為宇拔泰茅以為堂隆大過

以為棟建書院于鳳岡蓋以植人紀樹天綱考法

象陳典常而永垂丕休之烈于無疆也爰有二湘

公子九疑丈人馭黃鵠之颺輪驟繡麟之雲與抗

招搖以遐征指攝提而上馳嶮巖而眺望肆懸河

之修詞公子曰竊伏湘湄遐哉邈矣不圖今日院

斯落矣青青子衿于胥樂矣且台聞諸蓬萊之陽

扶桑發頰迷穀揚彤檄蠹映波其涵縮拍杖搖嶼

其菁葱迺有青陽之宮綺疏繁星薄梳宛虹安期

涉咸池而洗日羨門登暘谷而凌空崑崙之西螭

淵泱漭洳澤淪漪冢遂律光其中霞泰器欽寄其

截霓迺有素灑之居晶宮栖魄璇題納曦容成據

沙棠而逍遙韓衆依子桐而栖遲炎嶠之南緬渺

丹垠紆迴紫暝育隧暢薰風之籟軫巖懸火德之

躔迺有朱門之垣金支通牖玉珽照筵祝融司祗
而開宇宙赫胥御紀而墾天田瀚海之吐氣凝霜
寔精結冰嶠吉良產千金之駿芻吾具五色之質
迺有玄景之室閭家九關礮礮萬壁嘯父掣長鯨
而揮擢任公跨巨鼈而負龜先生濫用龜朋革乎
豹蔚晞青陽之瞳朧飲素灑之漉溼服未明之陸
離被玄景之赫奕無乃窮四荒超八極于焉栖息
爾矣乎先生曰恣遠遊者疇與近取諸身務外觀
者疇與內求諸心子言博矣盍載陳之公子又曰
太昊乘震執規司春玉衡秉信珠斗回仁蒼隲駕

而協氣和玄鳥巢而條風温于斯之時紅藥翻階
朱槿蔭庭靈運賦池草而冥機自觸孝綽感山櫻
而雅韻攸成炎帝乘離執衡司夏赤鸞鳴晨丹良
燭夜于斯之時蘿烟裊帷松風入榭江淹懷綺樹
而興慨臯蘭傳玄思秀麥而宣謠田稼少昊乘兌
執矩司秋悲臺蕭瑟哀壑颺颺鵲梁迫而津橋橫
蟾桂芬而月殿幽于斯之時竹君萬箇木奴千頭
左思睇翔鳳而金鷄初動潘岳咏歸燕而玉露方
流顓頊乘坎執權司冬同雲集霰寒漸凝淙日陸
旋而品彙藏星紀周而象緯從于斯之時代屬玄

英律應黃鍾穆王齊平圃而白雪縹緲梁生游兔
園而素雪玲瓏先生漸儀鴻羽鼎食雉膏煦春元
而熙熙茂夏亨而陶陶廣秋和而肅肅乎冬貞而
昭昭無乃順四時周大虛于焉居諸爾矣乎先生
曰善言天者必徵諸人善言古者必準諸今子言
近矣願終陳之公子又曰粵稽有漢西雍是京差
我虎觀蛟螭鳳旆麒麟轟轟而芙蓉披鳩鵲鵲顏
而椒蘭榮迺有承明之廬著作之庭銅龍承宇金
馬標門方朔占歲星之色象更生招太乙之威神
粵稽有晉江左載作鍾山龍蟠長江蚪躍顯陽華

曄而亘赤烏永安離奇而延朱雀迺有華林之園
昇元之閣江實浮波山葩吐萼陸機詠芳藻以敷
文謝眺賦青山而尋樂粵稽有唐起于晉陽華清
毓秀興慶蜚香勤政通天而接熊耳飛山凝碧而
起鷗翔迺有結璘之樓鬱儀之堂虬漏宵沉鈴索
畫張李白搗辭而焜煌螯掖韓休抗疏而飛翥鸞
章粵稽有宋國于汴京潭河為池嵩岳為城嘉瑞
嘉福以延弘慶純和熙和以聯邇英乃有徽猷之
製寶謨之箴十閣叢起兩制並名易簡承恩而御
書飛白永叔視草而史策垂名先生節以制度願

以保貞紹漢賢之高躅步晉喆之芳塵追唐臣之
逸軼播宋儒之光靈無乃兼四代冠群英于焉浚
明爾矣乎先生曰載事者存乎史載道者存乎經
子言美矣吾何能焉九疑丈人喟然嘆曰於乎繫
嘻子知其一未知其二也夫胡人見布而疑曆越
人見麝而疑毳拘乎藝也奔蜂不能化桑蠟伏雌
不能伏鷄卵泥乎類也若公子者未免馳志藝文
之末而或遺其本游精散殊之博而靡得其約也
已迺若先生之登茲鳳山也其東則有豐財靈應
幽蘭點筆蕭堆仙雲雪峰平髻河抱石牛而掩映

星河溪涵赤馬而虛涵天日其西則有鐵山壺山
蒲首瑞雲感山廬山芙蓉石門湖出二羅而澄潭
瀦蓄水趨陸口而長江吐吞其南則有桃花白石
月山梅岑金紫五洪雲臺荆泉鹿洞谿研而林陰
夕合羊樓峭嶇而崖花畫研其北則有龍翔行將
鳳隱石盆雷壇天馬明水山門北渡浮舟而汗鑄
懷古西良遺堞而烏石藏靈是故鳳凰于飛維石
巖巖三峰層巒五水紫灣金壘石筍金臺雲髻隆
岡秀起而越翼南闡平原衍夷而迴抱西關是故
其為書院也其中則有集雲之樓淨煉繪綾堪對

網繆飛薨特起叢枿孔修若升玄圃之丘爛瑤宮
森爽闕朝霏入而暮靄浮其左則有無逸之所堂
曰頤賢麗澤輔友齋曰六行慎修恪守若窺瓊林
之牖辨商彝測姬卣輝壁月而燦珠斗其左則有
務敏之軒堂曰文會列鼎鳴絃齋曰六德仰高鑽
堅若升石渠之筵庇廣廈履細旃羅寶典而肆瑤
篇其前則有壘翠之門靈峰矗立河流吐吞蛟騰
虎變鵠舉爲騫若排建章之閣金支簇朱旂翻滃
仙掌而迎朝暾其後則有六峰之亭仰高游息耽
幽會冥意草交翠野於搖青若入瓊林之園采芝
秀紉蘭馨杏鶴渚而迴鳧汀是故山以鳳靈院以
山名先生之建茲院設茲教也而豈徒哉昔者鳳
凰之為世瑞也軒轅臨玄扈而受圖冷倫適解谷
而協律高辛聆音而知化必臭名官而纂曆巢于
阿閣堯命羲和以授時儀于簫韶舜察璇璣以齊
政翔于紫庭文王占景緯而游歌止于岐山召公
陳卷阿而諷詠茲蓋傳之道統納之世軌昭之人
文章之物采示之賢規約之邦紀所以淑斯文者
懋矣望諸生者厚矣視唐之集賢麗正含象光順
宋之嵩陽白鹿石鼓嶽麓蓋異世而同符焉爾矣

先生聞之有睟其容有盱其衡喟然嘆曰有是哉
九嶷丈人乃歌曰惟九嶷兮蒲山之宗仁者壽兮
靜斯同三湘公子亦從而歌曰惟三湘兮尊水之
濼智者樂兮動斯同先生乃磨載歌曰九嶷截業
兮君子以崇德三湘濼湫兮君子以廣業吾與吾
走期大同兮永貞吉

史南口臣嘗觀諸詩倬彼雲漢為章于文周王
壽考遐不作人言文王法天之文以教乎人久
於道而化成也崧高維嶽峻極于天維嶽降神
生甫及申言宣王獲地之靈以鍾乎賢應其勳
而功成也夫有文王作人之化以創業于前有
宣王得賢之助以中興于後周家有道之長其
所繇來者逖矣哉

朝肇建學宮載造多士惟才是用不拘其類厥後以
臺臣督兩都以憲臣督諸省法紀漸密文軌大
同自韓陽至薛綱時則沕沕爾士則穆穆爾其
雲漢為章之初乎自蔡潮至張邦奇教則諄諄
爾士則彬彬爾其崧高降神之時乎而乃今天
人交感神化旁通其育才贊政固有如韓如蔡
者繼也薛綱已見登績紀張邦奇已見景則紀

茲述二賦以考二公之素履云爾贊曰古先哲
王學必有師虞庠俎豆姬離鼎彝虎闡講道騫
潭陳詩韓公肇賦蔡公授詞國之棟榦士之著
龜

林廷玉

謝朝宣

桑悅

林廷玉候官人進士知茶陵後仕至都御史初撰東
軒賦其辭曰歲舍困敦葭飛函鍾哉生明之夕有
造東軒主人者曰桃都聲動福博景從荒長庚以
倣墜眺扶桑而已紅發物類之色象開地垓之冥
蒙晨光嬉微野色瞳矓二儀宣朗八極攸同後江

山之秀麗謁庭院之玲瓏况鬱蒸之未熾正清明
之在躬淑哉景也而吾與子髮髯齒皓目明耳聰
幸將來之無極猶朝暾之始東其為喜何如哉主
人曰惡是何言也歲月征邁梭擲羽飛繞黃口之
未幾倏白頭之遄催苟來者之無聞不過與草木
同為朽腐而已耳又何茂齡之足恃乎蓋東之方
位於時為春於卦屬震春之為言蠢也萬物蠢然
而生震之為言動也萬物紛然而動春以一元而
首四時乃溫和始至之鄉震以一陽而下二以若
雷震奮發之象故君子當乎春也則乘時進學之

卷五

三六

不遑聞夫雷也則恐懼脩省之因暇安肯樂其壯
盛玩時愒日私竊喜乎哉乃若大禹猶寸陰是惜
一饋十起文王亦且不遑暇食緝熙敬止而予何
人顧敢般樂自逸豫哉乃若及此富强亟圖典禮
居敬以存吾心格物而窮衆理使付畀之善罔虧
其初而天下之道咸足於已秉苞桑以自持必全
歸而後已執此心以往何天下之事有不可為者
乎若夫壽夭窮通命也何足計哉不識吾子以為
何如客乃嬰然而起負墻而立曰子之言昭然若
發蒙矣敢不承命於是擊節而歌曰歷少原兮清
芳啖沆瀣兮九觴闕方壺兮圓嶠麗桂擢兮蘭觴
願從美人兮歸道德之鄉言未既忽而陽鳥中天
簷影頓移客喟然曰無乃真宰促其畧以乎吾子
之言乎主人喜其與客情之符契也拊髀掀髯笑
揖而別

謝朝宣字汝為臨淮人弘治癸丑進士謫黃州同知
寓羅田遊石險作險賦其辭曰朝發漢川將之羅
田道轉幽谷河渡白蓮遵徑路之崎嶇喜舟楫之
輕便問津兮何處經壑兮窮源東接平廬州之鄙
西轄乎齊安之邊石橫截兮踳蹬水穴出兮潺湲

舟返而解纜輸人濟而褰裳寒此蓋天所以限乎
西東繁名險而今傳於戲異哉易設守國傳城虎
牢吾嘗聞險之名矣晉有龍門蜀有三峽吾嘗見
險之形矣然形勝者名或不彰名聞者實或未著
孰若險之專名於斯而雄據者也爰命舟于泝流
指壑緣巖扳曲山陰有約瞬息咫尺水湄山脚萬
籟生幽孤帆就泊曳杖逍遙可喜可愕渡宕兮州
摧石礙兮波迴無蚌兮噴珠不雲兮轟雷烟霞兮
掩應心目兮所開避炎濯風凭高遠望水水山山
嶺步異狀浪奔而激石缺而亢御時兮如較相軋
兮如傾磊落兮如拳鱗次兮如鯨或相傾而形錯
或相較而勢爭斯物態之變化類人事之縱橫于
是烹茶代酒拜石為朋有吟風之雅興無繫日之
長繩已而歸舟順下林鳥欲投去危即安他復何
求心怡兮有得履正兮無息見險兮思欲知止過
險兮豈宜重遊嗟乎羅田之險一方勝跡隱而弗
顯識者心惻若真當道自貽伊戚嗟余視險幸當
晴日一遇陰晦變恠百出雖心雄萬夫亦不免危
慄若憚險阻必欲治平不思托根深固徒殫力而
難成或者動搖山脉寔足致陵谷之崩騰險在目

前隱如勅敵王公以之恃固其域時有常變安如
一日君子思之以崇厥德遇有順逆介焉如石於
戲有險而思無險而忽思者常榮忽者恒辱我在
平地無忽險中人因處險每見成功周除蛟害班
探虎穴在昔有光于今為烈逢險莫避取義成仁
未險莫蹈明哲保身險乎險乎豈無從來維時與
義易稱大哉載稽郡誌名險何年且喜沈公之詩
惜無蘇子之篇當時一經目而品題何于此而遺
旃無乃身險阻而備嘗口聶嚙而慵言不自我後
孰開其先但無赤壁之筆終有愧于坡仙

桑悅字民懌常熟人年十七領鄉薦授泰和文學遷

長沙府通判謁賈太傅祠作賦吊之其辭曰湜長
江之莽莽兮中有江曰汨羅惟靈均之往湛兮衍
千古之清波何先生之清風兮正靈均首丘之所
都投雄辭而嘅吊兮若救種而烹蠶珮帶遺乎蘭
蕙兮衣裳留乎菱荷儼騷經之滿目兮邀予辭以
相歔赫炎漢之方隆兮視溺楚於一螺稊機衡以
平運兮齊日月乎羲和飛修壙而內薄兮手排揆
乎嵩蟠驅魃魍而比健兮豈脉息之微瘥本根豐
而孰孰兮亦盤翳乎條柯鬱蚩尤之柱天兮入剪

伐而么魔倒冠履之上下兮視蟻蛭為嗟峨僉譚
譚以笑語兮獨予淚之滂沱催黃潤以成匹兮豈
欽止乎龍梭含珪璋於巨璞兮隨岡阜之陂陀左
控搏乎南威兮右撫抹兮妖娥憐陵華之奇質兮
弄光景而逶迤收馳驟而守閭兮夢天山以秣禾
憑旱雲以輸棕兮惜來日之無多悲崦嵫之易暮
兮慨致鵬之非圜圓土之汶汶兮鑄寶鑑而為
模堯空言之際遇兮皎夜壑之鸞坡曰予又作茲
土兮後千載而殺那遭

聖明而獨詘兮胡今古之同科蹇人生之窮達兮直
寒暑之經過委吾身於造化兮任刀秣而香塗紛
紛世之變幻兮消長袖之傴僂予將釀沉以霑醉
味淪陰以成鋪升都嶠以長嘯兮陟委羽而高歌
至息慎而默默兮欲反觀乎太初終吾生以泮渙
兮補先生之婆娑

顧璘字華玉吳人弘治丙辰進士累官都御史巡撫
湖廣登衡山祝融峰觀日出作賦其辭曰維南衡
之崇嶽標祝融之危峰下蟠據乎厚地上峻極於
蒼穹匪丈引之可度盡宅山其難比隆睇四極而
無敵又何限乎寰中觀其嶽崑崙律直上莫止捫

卷之五

四十一

歷參井靡高弗至躡浮履霄帝居或指足跪汗慄
不敢俯視何其高也若迺斗杓既及啓明未升漏
刻已盡荒鷄南鳴天蒼蒼其一色浪萬動猶無聲
謂日出其可觀乃歧望於高亭爾其游氛且凝灑
氣欲豁萬里乍近沔沔穆穆睽彼陽輪尚爾澗汨
冥迷遼漠恍不可度少焉光景上燭高漢舒白如
火將炎大暗微晰羣望方勤日不移眈積霽條裂
閃爍驚電駭指失叫乍見一綫漂沉搖曳湧出波
面燭籠外赤鳧卵中黃上殷下闇半吐半藏依微
晃漾如覲海色水火交爭良久乃脫於是金烏高
舉若木影離羲和叱馭八表馳暉所可疑者視扶
桑于咫尺東曠望而無窮日遲天於一度何寰周
之莫同參渾儀與宣夜猶想像其若懷大哉天之
為天也固致詰而難終

史南曰嘗讀祝君澤古賦辨體云詩訖于周騷
訖于楚為賦者當以詩為體不當以文為體後
代以來不知經緯相因正葩相頡賦反為文文
反為賦亦可駭矣自江文通著恨賦庾信多虞
險之詞成公綏著嘯賦陸機多寓情之作謝子
之險賦其識茲乎自賈子吊屈吏聞有吊湘之

哀楊雄反騷柳子厚有反玄之慨桑生之悲詞
其識茲乎是故述三賦以見古體之難也贊曰
黃之石險是寓羅田東坡赤壁于茲貌焉潭之
汨羅眺彼湘壖太傅遺文相望幽玄謝子秦彥
慷慨幽燕桑生吳髦翱翔海喚顧翁司寇雍容
日壇爰揮彤管以續斯篇

管訥

黃溥

楊琚

徐楨卿

沈鍾

管訥字時敏華亭人工詩能文有蚓竅集評者謂清
新幽柔可與袁景文並駕洪武中以秀才仕至楚
府長史子孫皆仕于楚今遂為楚人其遠游篇云

御風日萬里逍遙登遠遊竦身青冥表瞬息四顧
周目力隘八極壯志局九州泰山小封堙滄海渺
浮漚俯視瀕洞間萬彙等蟬蛸浩歌挾洪崖長嘯
訪浮丘迴颺欵閭闔謁帝十二樓酌我紫霞觴遺
我青鳳裘授以長生訣歷劫三千秋從茲謝流俗
大塊同悠悠又滕毅字仲弘鎮江人洪武中使楚
吊屈原詞詩云檐帷褰薄暮迴颺吹白雲下有栖
神宇慘淡臨江濱行吟既不返遺響寧再聞綠榮
並丹綵婉爾含清芬沐芳正冠佩酌水掛夕熏長
歌靈谷應眷思何紛紛願言卜瓊茅率成不可群

渚宮望儀羽再拜雲中君

黃溥字澄濟弋陽人正統戊辰進士授監察御史謫
施州衛經歷有適安堂半逸亭觀瀾亭諸記後仕
至廣東按察使其寓施客星山歌云清江之山天
下奇客星屹立無與齊低處猶疑紅日近高處恍
覺青天低群峰落落何截業欲斷不斷如擘鐵雲
邊樹色自遠近雨後嵐光靡斷絕千巒萬岫勢壓
天憑陵五嶽冠山川白鶴玄猿歲相促幽花野草
爭春妍孤高自是施之望左右群山皆退讓瀑流
不數廬山雄奔騰直下三千丈丹崖翠壁高重重

閱風玄圃疑相通避俗豈無曠世士採芝應有商
山翁君不見太白天中僊謫僊於此曾盤旋君不
見涪翁千載士居黔未必不遊此到處景物皆品
題何事茲山無一語山川秘靈豈待時後三百年
來何遲勝跡一一探索遍前哲敢企同襟期我有
紫霞想欲賦汗漫遊呼風乘雲駕黃鶴扶搖直上
最上頭萬里銀河可飛越遨遊擬叩玉皇闕下與
濁世掃粃糠上扶雲霧扶日月功成追逐浮丘翁
冥鴻杳杳秋濛濛便欲與君飲一斗醉後拔劍砍
取十二青芙蓉

楊瑒字朝用泰和人景泰甲戌進士授兵部主事轉
 郎中擢湖廣叅議撫治荆襄築老龍堤疏竹筒河
 及創劉家隔雷峰坳諸要地遷叅政瑒善吟咏其
 寓歸州十景詩云邑治枕長川居民適成聚清江
 遶東流白水猶回互昔為陸遜城今轉西陵附地
 險此寨高人安太孺固鷄頭青如藍虎牙勢如怒
 鼎峙架鍋峰坡開袞鍾路隱隱吳相臺卓卓商英
 墓伊誰遺塚多尚存四九數峯望州山紫紆白
 羊渡更說滄茫溪奇石生夏雨我來肆旬宣而欲
 知典故一覽遍山川千村炊烟霧馬鬣浪自平龍

窩神亦怖因綴幾行詩慙無才七步

楊茂元字志仁鄞人楊文懿守陳之子也成化戊戌
 進士歷遷山東副使才性權端逮繫獄謫同知長
 沙府滴沅州蠻叛檄撫之乃撰詩寄辰守戴敏
 云峒蠻巢近辰沅邊袁兇稔惡凡幾年郡邑聞災
 雉藏首官軍遇賊龜縮肩事聞當道為招撫墨郎
 索賄更索錢木刻盈車竟何益鈎刀滿眼還如前
 邇來如入無人境猛虎張吻蛟垂涎官路每來戕
 富宦孤村半欲斷人煙民多登高結山寨賈客
 林誰敢先四達通衢成異域兩藩軺使解征驍議

成三省請誅戮小醜曷足污戈鋌幾度招徠渾不
省百方守禦終徒然戴侯自是降魔手

帝命專城印懸肘辰郎蒼生我所摩潢池赤子吾何
有風聲先已動三苗資遣說客十伯耦分疏禍福
更徹心宣布恩威不容口饋以牢醴回峻辭增之
金帛亦弗受郡蠻向化聽教條太守開誠勞牛酒
誓言永不犯邊陲以手加額呼父母皇華徹夜有
鳴騶巨室安眠無吠狗從茲庶富教化行萬戶春
風醉花柳知君勲業詎可量泰嶽巍巍比培塿茂
元後遷廣西參政任刑部侍郎

沈鍾字仲律金陵人天順甲申進士累官湖廣提學
副使撰洞庭湖詩云昔聞洞庭湖君山極葱蒨昨
從岳陽來始獲君山見掛帆願登臨弗值東風便
陸行踰長沙靖綏數州縣迺遵湖北歸三月幾及
半艤舟城陵磯君山又當面始見心已傾又更增
繚繚登臨最上頭眼界會須展黃帝飛昇臺婆娑
躡蒼蘚繞頭雲葉垂盪曾浪花捲陰陽究推移烏
兔看旋轉仍弗直便風竟莫償斯願風伯倚顛狂
公然少收歛豈彼亦有知我遠遊倦遍每遊輒有
詩在慰都題徧維茲洞庭湖海內首稱險胡忘千

金軀執僻不少貶載感風伯情顧我一何春題詩
在殷勤三復愧膚淺題荆門詩云荆門道阻且脩
荆襄南北當咽喉乘傳往來者絡繹無時休我來
適值山水啼鈞鵬但見高原下濕一碧萬頃麥浪
浮呼天控訴天不知願天十日不雨而暘立俟黃
雲收比及年來三不收十室九餓逃而流賣兒鬻
女骨肉相仇讐歸來收麥聊為身家謀含哺鼓腹
歡以謳俯仰穹壤夫何求嗚呼我方素餐而飽徒
包羞為渠樂與憂其憂不然視若風馬牛而我一
斯世之綴旒已焉哉厥咎將誰尤

王鼎字元勳常熟人成化己丑進士授刑部主事轉

郎中擢湖廣參議其遊西山用蘇東坡韻曰我飲
不盡靈溪醅醉遊松間想舊栽斯人已去手澤在
相見惟有空山梅登臨慨古意何極半江落日搖
崖巍當時陶公讀書處野狐蔓草登荒臺松風閣
中還少憇山泉捲幔清浮埃怪來春雪始生色林
坳屋角皆瓊堆梁園無人召屬賦自吟柳絮傾金
罍潛偷煖意破寒色迸芽早笋抽庭隈闌干徙倚
快雙目萬頃湖水青於苔避地謾憶元次山白雲
千堆手自開當時已恐淳朴散豈知世道今愈摧

無情悍吏肆苛政追呼村落敲如雷老夫靜聽行
路語仁執叔度何時來却憐今夜西山月松濤萬
壑清猿哀

邊貢字庭實歷城人弘治丙辰進士授太常博士擢
兵科給事中正德初逆瑾用事出知衛輝府尋改
荊州擢河南督學副使陟南京戶部尚書貢與北
郡李夢陽信陽何景明相友善肆力古文充長於
詩其寓鄂渚詩云維舟泊鄂渚登高覽洞庭地連
秋水白天入暮山青望闕瞻星斗懷人感鵲鴉漁
簫向夕起嗚咽不堪聽又云短棹鶩洪河川行憂

畏多轉憐時役苦無奈旅程何霧黑江龍鬪雲腥
崖虎過黃昏投古驛從此順風波又云黃昏峴山
曲征馬倦躋攀雨過蒼林外虫鳴廢井間斷崖成
聚落深巷隔塵寰古驛懸燈候重門未掩關又云
峇峇南郡樓到郡此重遊島沒雲中樹天浮海上
漚旌旗連戍色鼓角動邊愁萬里看西北蒼茫見
帝州又云江郡傲雲樓東南據上游日華浮野雪
霞彩散川漚俯仰悲千古登臨起四愁王師神且
武何日靖西州

李濂字川父汴梁人正德間進士授知沔陽州濂幼

穆風內紀後 卷五
受學于空同李夢陽故其詞藻雋拔迥出塵表撰
沔陽紀俗詩云鱗郭瀟江曲風流自昔稱家家住
水閣日日下漁罾雲濕常垂雨湖寒未見冰風微
鷗戲藻沙靜鷺啣菱翎羽充王貢魚蝦入歲徵蓮
舫秋競泛竹檻晚堪凭陸羽風如在靈均恨不勝
漢唐兵豈到吳楚勢相乘地僻逢迎少江清賞宴
仍羔羊懷漢詠琴瑟對漁燈放柁初猶怯垂綸近
亦能踈狂叨守牧高興益峻嶒

徐禎卿字昌穀長洲人正德間進士官大理寺副登
黃鶴樓詩云未有干戈地能令棟宇全乾坤餘壯

觀荆楚鬱山川鶴唳寒天近江深禹廟前舟檣控

南北節鎮此旬宣令尹乘清暇使君同祖蔭炎蒸
飄不到虛爽境何偏乃繼登臨跡空懷作者賢風
烟一回首今古共淒然握手將安適經秋未擬旋
迢迢沙際月遙憶桂陽船又寓武昌詩云洞庭木
葉下瀟湘秋欲生高齋今夜雨獨卧武昌城重以
桑梓念淒其江漢情不知天外鴈何事樂南征
高叔嗣字子葉河南人嘉靖癸未進士授吏部主事
轉郎中擢山西叅政轉湖廣按察使卒于官其詩
云大堤兩岬春流滿峴山十里啣日晚新雨深沉

洲嶼移餘霞明滅川途遠南來鞍馬背高城泛舟
始作漢江行總轡昨朝當寒食鼓柁今日值清明
清明寒食愁江路逢人乍問栖泊處楊柳深垂渡
口喧莢花淺映村頭暮襄陽使君乘暇日邀飲習
池酒興逸然燈清夜歌管鳴吹角臨波魚龍出去
國未覺客身輕乘流翻恨風帆疾別君轉入江湖
長明發解纜渾如失又郢城至潛江詩云漢渚雨
聲深日暮愁客心楚山雲霧多其奈客行何時時
登岸覽風物往往張帆去超忽泐潏江流雨正添
蒙茸春樹日催發茲行豈是乘桴意欲遣虛舟隨
所至生平本自江海人終朝遂譜魚鳥事投札鄉
園報所恩塞芳欣及仲春時頓忘異國勞行役但
憶同心廢賞期

史南曰夫詩之道大矣孔子曰詩可以觀可以
興可以羣可以怨三百篇後詩其難哉自河梁
為五言於是五言體栢梁為七言於是七
言體豐沛大風臨汾秋風為長短言於是歌
行體迨韋孟傳經薛綜効則黃初七子濬其源
永和諸賢滂其流至六朝則纂組刺繡綺靡藻
麗文盛而實微亦可慨矣唐初沿其體制宣之

音律燕許擅其宗李杜鳴其盛宋詩譚理元詩
工詞視古昔聖王矇誦警箴之訓太史采風陳
詩之意為何如而乃炫爛俳儷若茲極也我
明御宇初命樂韶鳳輦撰洪武正韻斤沈約四韻之
非既而程敏政葺

皇明文衡革元時文類之陋然而高才寡和神解難
踪律韻雖諧古風鮮協求其如顏劉沈謝之思
玄王楊盧駱之迹體亦已難矣其有事于楚者
若管時敏之飄灑黃澄濟之渾雄楊朝用之工
致楊志仁之豐腴沈仲律之沉確王元勳之瀏

亮邊庭實之冲澹李川甫之脫灑徐昌穀之
逸高子葉之奔放咸足以鼓吹騷壇笙簧頌室
被之廣奏登之升歌洋洋乎其盈耳也哉贊曰
詩有別才非關學也詩有別趣非關理也惡紫
奪朱色相擬也惡鄭雜雅聲可鄙也羣哲高標
國之紀也白雪陽春播郢里也

王憲

錢如京

張漸

劉節

馬理

閔如霖

李本

張袞

王守

王憲字維綱東平州人弘治庚戌進士累官兵部尚
書乃作五洪並壽詩云五洪山中舊戶曹白馬青

袍意氣豪苦恨浮雲蔽日振衣却走漢之臯誅
茅卜築傍山趾時復看雲聊隱几十畝桑田躬耒
畔念年城郭足不履興來浪趾乘氤氳金紫芙蓉
伴夕醺晚塘秋結芝蘭佩鹿洞朝隨麋鹿群即今
壽已愈八表耳目聰明只如昔中閨復過古稀齡
諸郎况有玉堂客玉堂仙郎衆共竒雄文蚤受
天子知鯨魚跋浪動鱗甲鳳鳥當陽輝羽儀
紫誥承恩出金馬鸞章直達衡湘野華筵稱慶合椿
萱玉樹聯翩盡梧楨僊郎獨繫白雲思千里慙勤
為獻詞南山北嶽天無極應是仙郎祝頌期

錢如京字公溥桐城人弘治壬戌進士累官刑部尚

書乃作五洪並壽詩云吾聞五洪之山三楚雄蒼
崖翠壁交葱龍衡岳南來負竒勢回光更接巴陵
東山人結茆踰八十孤標挺挺如山立憶昔嘗趨
青瑣班高名推重驚塵寰急流中危便勇退脫屣
軒冕猶高顏年來興味真殊絕金紫芙蓉送風月
杖藜隨處有攀躋晚塘鹿洞看華髮俯仰萬慮復
何有意態僊僊良不偶閨中白髮偕長春歡然相
對仍如賓人間完樂能幾爾况復僊郎侍從
明天子鳳羽日揚輝鸞誥雙頰紫媚茲慶澤遠復深

白雲獨繫僊郎心遙想歌鍾間綺席翁兮母兮樂
無數相看鳳凰景共進鸚鵡盃青天不老海月白
慣見煙霞縹緲浮崔嵬我向湖南一矯首高堂佳
氣衝牛斗願言僊郎日近五雲邊五洪榮壽應同
久

張潮字惟信內江人正德辛未進士選翰林院庶吉
士歷禮部尚書掌詹事府乃作五洪並壽詩云南
國有文鳥其名曰鳳凰陽德會精靈離火騰朱光
雄雌相齟鳴早出應時康耻同鷄鶩群避世歌楚
狂朝從砥柱遊莫入丹穴藏巢生十二雛各各備

絳華一雛儀

大廷雲霄日翱翔品題自天老感應符軒皇太象既
云異九苞亦已彰覽德超玄扈賀世鳴朝陽羽儀
耀奎壁歌舞諧宮商饑餐帝煇膏渴飲玄圃漿猛
屈鷹鷂志班清鴛鴦行山鷄空照影鷓鴣雀詎呈祥
謝毛眷世美荀池專令望近啣五色書遠奉千年
觸張樂洞庭野佩蘭澧浦鄉歡靡眩鍾鼓甘且充
琳瑯福比衡嶽崇流並湘水長茲聞五洪山遙接
鳳凰岡為君歌此曲聊以陳高堂

劉節字大庾人正德間進士累官都御史刑部

侍郎乃撰衡嶽篇以壽五洪翁曰瞻彼衡嶽兮嗟
哦鬱蒼睠彼湘流兮其源濬長峰巒蟠結兮金疊
龍翔九江滌泗兮諸湖汪洋維楚有材兮鍾靈降
祥元精萃蘊兮發其秘藏紹美先烈兮登明中鄉
翱翔雲霄兮委蛇廟廊時乎弗辰兮柄竊貂璫掛
冠勇退兮五洪倘佯天畀耄耄兮既富而昌慈媪
配德兮眉壽且康瑤瑜璫兮載篤其慶白眉挺
修兮清廟珪璋才驅屈宋兮文雄班揚馳聲詞林
兮簡知

神皇榮錫自天兮絲綸煌煌爰服嘉命兮渥其龍光

弧悅交縣兮鼓鍾在堂載歌載獻兮金罍瑤觴載
祝兮福履穰穰休繁祉庶兮如川如岡豈樂宴豫
兮期頤永藏以引以翼兮純嘏無疆

馬理字伯循三原人正德甲戌進士吏部文選郎中
累官光祿卿乃作五洪並壽詩云湖南有一老申
申美姿容釋褐司錢穀清譽聞兒童當途逢睽弧
遂步陶潛蹤結茅五洪谷一畊三紀窮同心者誰
子中閨有孟江時饑巖石下相對如賓恭積善生
鳳雛枚數及六雙一鷄儀韶樂

帝悅錄其庸綸音九天天下湛恩及嫗翁嫗年七旬六

翁躋九九豐章服照春醞並酌顏偕紅膝前雛將
鷄舞列紛叢叢相彼湖南域輝輝草木穠願言如
日月福履方瞳矐

邵銳字思抑浙江人正德戊辰進士累官大僕寺卿
乃作衡嶽篇以壽五洪翁曰洞庭西去連衡嶽山
水高深氣磅礴靈秀千年莫自秘挺生豪傑才超
卓少年入拜戶部郎胸蟠直氣摩穹蒼痛憤權奸
竊國柄須臾草疏馳 明光大聲一呼肝肺裂安
得寢皮仍飲血拂衣歸卧五洪雲默挹餘忠向空
翹居然老鳳得異雛皇天昭鑒誠不孤文彩翩翩

起丹穴羽儀白日當天衢出入頻軍侍經幄

聖主虛懷承啟沃封詔駢仍寵錫蕃錦襲龍函捧盈
握五洪大夫八十餘賢哉爾相年與俱顏面如丹
鬢垂黑玉堂高並神仙居傳家有義方慶澤殊未
央胤嗣繩繩嗣忠孝千古萬古遙相望

馬汝驥字仲房延綏人正德丁丑進士歷國子司業
禮部右侍郎乃作五洪行詩云君不見五洪西南
金疊開蒲圻尊水雙縈回鬱鬱高堂百仞立繪圖
直擬登蓬萊象形鳳翼名奇地不道天中見龍氣
入門青峙在椿長臨園紫屈商芝嚴堂北樹萱朝

倍榮丹霞萬朶何晶瑩芳節張筵賀賓集翠虬白
鹿車縱橫陞蘭庭桂况葱倩學士鑾坡更才彥五
色斑衣繫遠懷

九重綸綽承殊眷龍童飛映楚天雲南斗瑤絨伴赤
文跪薦椒漿稱萬壽煙環霧珮行繽紛倏爾三千
一爽實桑田滄海慚僊術不厭春秋素髮繁長看
日月青天山君不見衡山突兀跨絕南國摩蒼穹
壽考勲名萬古同

張袞字補之江陰人正德辛巳進士累官國子祭酒
乃作五洪並壽詩云白雲覆鄂渚黃鶴臨江湍煙

霞恣揮霍錦繡開江山江山自古翼軫地鸞峰鷲
嶂森虧蔽中有仙翁握紫芝咲迎王母班龍戀憶
翁昔作尚書郎崢嶸寶劍橫秋霜低頭不謁丞相
府抗顏青鬢歌滄浪即承封誥五雲裏名在丹霄
跡黃綺鳳林歌動彩霞飛白玉堂高借燕喜堂中
絲管聲沸揚椿庭風度萱花香覽裳一試瑤池舞
絳綃儼對咸陽粧學士才高誰可比鑾坡視艸承
天語金蓮長夜照蓬萊特旨恩輝亘寰宇吁嗟樂事
南山廬紫澗逍遙白鹿車子孫滿眼真璠璣我歌
為附青鸞使錦爛空中五色書

王守字履約吳人嘉靖癸未進士吏科都給事累官
都御史撫治鄖襄乃作五洪並壽詩云司徒楚名
俊矯矯人中龍慷慨負經濟清廟儼鍾鏞時危鬱
孤憤直道固難容掛冠出閭闔長嘯入雲峰淑人
合坤德窈窕君子述山河宜象服雖雖鳳皇傳聖
善構重基多男啓祥休雄氣吞七澤文明藻九州
瑤華懋落沃石渠精討求論道述軒虞講藝準商
周陟降日月側恩寵雨露稠

帝孝錫爾類奎章賁林丘鳩杖恣幽賞板輿侍春遊
願言綏百祿養志娛千秋

閔如霖字公望浙江人嘉靖壬辰進士選庶吉士歷
陞諭德乃作五洪並壽詩云五洪先生天下奇飛
騰壯歲芳聲馳抗疏閭闔雲憑憑長嘯入山餐紫
芝玉堂學士揚世德遨遊藝苑稱多識視草獻賦
烟霞舒講幄論思啓衷臆
帝心寵顧恩非常一朝紫誥頒封章高堂具慶歡
異數五洪草木生輝光鵬袍鶴髮安且燠魚軒翟
服千花簇青春綺席傾瓊漿斗婺星聯照華屋况
復紫荆開庭隅芬馥郁郁飄衡巫東風欲送碧雲
去

帝裁華袞雙歡娛軒皇早晚進風后麒麟閣畫神仙
曹君不見唐家柳氏宋庠剛當時入相椿萱秀
李本字立之餘姚人嘉靖壬辰進士選庶吉士歷檢
討轉國子司業乃作五洪並壽詩云五洪之山向
奇哉崢嶸萃律齊三台祥光淑氣滿空谷中有高
人閒往來當年抗疏奪奸魄飄然不羨市朝樂白
頭相對老乾坤玉樹森森倚臺閣學士聲名天下
聞

聖心啓沃多奇勲殊恩一日貶二老

龍詒飛傳下五雲天開壽域此山裏長生惟見椿萱

爾八千共祝對忘憂人間福祉應無擬紫霞觴映
楚天明學士萬里馳歡情鸞鷲羣飛彩翮舞天風
嫋嫋來蓬瀛玄圃丹丘仙侶度洞庭衡嶽桃源路
精神容與護百靈承歡索笑窮朝暮境界分明迥
世塵仙琚玉珮相續紛但看五洪開日月清影婆
娑眷

紫宸

閻樸字文甫山西人嘉靖壬辰進士庶吉士檢討轉
右贊善乃作五洪並壽詩云南衡屹立天下雄萬
峰突出凌晴空維嶽降神古亦有篤生賢哲稱人

龍甲科早占仙郎署邦教繁勞訂績著懷忠抗疏
排天闔直道難容亟辭去尋幽深入五洪山屋上
層雲去住閑松菊盤桓自成趣孤標挺挺疇能班
玉堂學士延世業日近

鑾坡承晝接班揚令譽徹 宸聰會逢千載

明良協一日恩封下九霄鸞回鳳翥恩光饒鵬袍麗
出天孫巧翟第新裁雲錦昭珍木交枝花並蒂誰
知開向唐虞世黛色霜皮晚更榮九天雨露寬無
際高堂胥宴何綢繆青瞳綠鬢不知秋蓬壺秘得
長生錄花甲須窮三百週蘭竹成行逗芬郁旋向

庭前娛綵服玉笋頻傾石髓香瑤池幾薦蟠桃熟
仙郎朝夕沃

宸衷龍顏喜動生春風尋荷殊私居異數崇階一陟
躋三公燮理陰陽調玉燭坐令四海歡娛足惟翁
與姥樂未央時對南山騁遐曠

劉儲秀字士奇咸寧人正德甲戌進士累遷湖廣按
察使仕至戶部侍郎代

諭祭于仙雲山乃作仙雲行云萬山合沓俱嶮絕仙
雲中立尤差別前有金紫後靈應杏林幽蘭左右
列五洪窈窕青螺堆三台迴翔丹鷲頤蕊花峰煖

散春霞桂樹岩寒屯夏雪吞吐烟嵐何足論千年
生氣獨盤結疑是巨靈劈得來不爾乾坤元造設
鳳沼仙人若好奇愛此常令心目悅輪值不惜萬
黃金要與密親作壽穴玄冬我來代

皇祀容與登臨停使節且喜天公太放晴空翠滿前
宛可擬由來吉兆鬼神司地靈况乃生人傑即看
學士築沙堤翊戴

中興比稷契茫茫天地有窮盡芳譽庶幾終不滅

許宗魯字伯誠咸寧人正德丁丑進士累遷湖廣督
學僉事後仕至太僕卿初在湖廣過白鹿山詩云

祇役時已淹還軫序屬暮顏曦隱叢簿凋芳泫塗

露委蛇雋水陽相羊鹿山路草玄愧茲區憑軾興

夙暮冲冲懷君子瑩瑩載珪璐繫昔奉音微倡嘆

陳韶護屢枉雲中翰更憶登樓賦烈響振九霄重

晴啓靈悟竭來殊塗軌翔泳各乖趣思借淵與雲

冀以申終晤佩德紉畹蘭攀蘿挹巖樹總轡陳此

辭衷悰庶能布

陸鉞字舉之鄞人正德辛巳進士及第授編脩出補

湖廣僉事過白鹿山留題云紫陽匡阜爭名勝白

鹿茅堂春洞開學士碧山今地主仙人昔鶴有時

來巖間桂樹蒙丹霧階下蘭華繡錦苔
國懷君歌七澤漢宮回首望三台

楊枯字汝承仁和人嘉靖丙戌進士授刑部主事轉員外郎知興國擢按察僉事分巡長沙寄玄素洞詩云於皇

明聖景命茂膺紹熙洪緒綏惠下民武功丕振文教誕興萬國黎獻共惟

帝臣翹翹荆楚萬國攸始憲憲夫子黎獻攸軌超迹江潭需儀瀛涖譬彼景雲從龍則起龍起雲從千載一時乃先俊造乃登秘書我我苗耆上莫下之

濟濟英寮俯莫亢之有華玉堂集惟英寮

帝曰爾賢德哉不佻金匱載啓彤管載操夙夜寅直德聲孔昭德聲孔昭

帝用眷命簡邁講幄橫經肆問一有元良四方表正傳說弼商后夔輔舜表正四方適隆大本肇建承華顯秩師允冠弁魏魏亦孔之敬諤諤論辭亦孔之諍嗟我小子翻飛自南雖則有翼困于丘樊曾靡先容乃辱異盼人亦有言知音寔難雖念知音愧非郢人大冶陶物既以陽春我車既飾我馬斯征載言贈處憂心如醒


張縱高郵人繇鄉舉授武昌府通判遷知光州寓蒲
圻寄玄素洞詩云盛代天源迥中興景運昌應時
生輔弼曠世際明良龍起當湖甸雲從自此方碧
鷄凝

聖眷黃鶴發仙鄉特立風塵表橫行翰墨場揮毫天
下妙舉步古人行曠度吞雲夢清標稱鳳皇西周
興禮樂止斗見文章夙契三才奧兼通百氏長論
文超杜甫演易陋京房青瑣逶迤珮金爐縹緲香
山蟲輝袞服豫梓壯明堂有客思觀海隨流渴望
泮上書漸擬愈作賦倦游梁附驥雖無地登龍幸

及牆撫懷增感激顧影獨蒼茫夢裏青雲遠春來
白髮長瀛洲虛目斷岐路實心傷葵藿常傾日燕
葭且冒霜長途方發軔矯首向孫陽

史南曰朱文公有言詩自三百篇兩漢三國為
一等六朝至唐初為一等盛唐諸人至李杜又
為一等晚唐則氣衰格卑無足取矣詩不已難
乎先大夫五洪翁壽八十有六母江宜人壽八
十寓史館諸公卿及坊局諸寮友咸慶以詩珠
玉充庭韶韻盈耳及仙雲代祀白鹿贈言靈洞
間居黃鶴宣謠洞庭增深衡嶽增峻不獨娛斑

衣稱壽觴通詩筒詠空谷而已曾子歌商聲振
林壑王通續詩韻協宮懸固可風之海內為
聖天子善化訓俗助也贊曰司馬而下四老者臣中
丞而上九子雋英蜚聲衡嶽振響洞庭雲君乘
颺湘妃如精穆如清風肅雝和鳴



步之紀卷之五十四

